

بِسْمِ اللّٰهِ الرَّحْمٰنِ الرَّحِیْمِ ۝

پنجابی

چھینویں جماعت لئی

(ترمیم شدہ)



پنجاب کریکولم اینڈ ٹیکسٹ بک بورڈ، لاہور

جملہ حقوق پنجاب کریکولم اینڈ ٹیکسٹ بک بورڈ، لاہور محفوظ ہیں۔

تیار کردہ: پنجاب کریکولم اینڈ ٹیکسٹ بک بورڈ، لاہور قومی ریویو کمیٹی برائے جائزہ کتب کی تصحیح شدہ

اس کتاب کا کوئی حصہ نقل یا ترجمہ نہیں کیا جاسکتا اور نہ ہی اسے ٹیسٹ پیپرز، گائیڈ بکس، خلاصہ جات، نوٹس یا امدادی کتب کی تیاری میں استعمال کیا جاسکتا ہے۔

فہرست

صفحہ نمبر	ناں مضمون	نمبر شمار	صفحہ نمبر	ناں مضمون	نمبر شمار
32	دُعا (نظم)	17	1	حمد (نظم)	1
33	ٹورمنارے (مضمون)	18	2	پیارے نبی صلی اللہ علیہ وآلہ وسلم (مضمون)	2
36	ساڈ ادیس (نظم)	19	5	نعت (نظم)	3
37	بول دا پالن (کہانی)	20	6	ایثار تے قربانی (مضمون)	4
39	میلا شالامار (مضمون)	21	8	قائد اعظم رحمۃ اللہ علیہ (نظم)	5
41	پاکستان دی کہانی (مضمون)	22	9	ساڈی صحت (مضمون)	6
44	آسین آں پاکستانی (نظم)	23	11	وطن دی حفاظت (کہانی)	7
45	سائنس دے کرشمے (مضمون)	24	14	تاریاں نے اک پنڈوسایا (نظم)	8
49	رتا اپنا کرم کما (نظم)	25	15	مسلمان دا انصاف (کہانی)	9
50	ساڈے شیر، شہید وطن دے (مضمون)	26	17	وڈا انسان (کہانی)	10
55	قدم ودھائی چلیئے (نظم)	27	20	شوکا جدوں سکولے جاوے (نظم)	11
56	دو کٹڑ (کہانی)	28	21	حضرت داتا گنج بخش رحمۃ اللہ علیہ (مضمون)	12
58	دو کٹیوس (نظم)	29	23	پچیاں دا اقبال (مضمون)	13
59	عید الفطر (مضمون)	30	26	بے زبان (مضمون)	14
61	بات بتولی (نظم)	31	28	اتفاق (کہانی)	15
62	میں چنگا انسان بناں گا (نظم)	32	30	بابا فرید گنج شکر رحمۃ اللہ علیہ (مضمون)	16

مؤلفین: ڈاکٹر رشید انور (مرحوم) © اقبال صلاح الدین (مرحوم)

ایڈیٹرز: ڈاکٹر محمد یونس احقر © مس ثروت سلطانیہ

ڈائریکٹر مسودات: ڈاکٹر مبین اختر © نگران: محمد اشرف رانا

ڈیپٹی ڈائریکٹر (گرافکس)/ آرٹسٹ: مسز عائشہ وحید © کمپوزنگ اینڈ لے آؤٹ: © محمد اعظم © حافظ انعام الحق
ناشر:

تاریخ اشاعت ایڈیشن طباعت تعداد قیمت

حمد

رَبا تیری کھیڈ نیاری
 وَن سوئی قدرت تیری
 سبیاں اندر موتی تیرے
 کھیتاں دی ہریالی اندر
 ندیاں ، دریا مارن ٹھاٹھاں
 آسماناں تے تَنبُو تانے
 پیدا کیتی دُنیا ساری
 پُھلاں اندر رنگت تیری
 وچ دلاں دے تیرے ڈیرے
 توں وِسین ہر ڈالی اندر
 صحراواں دیاں لمیاں واٹاں
 دھرتی وچ اُگاویں دانے

تارے تیریاں گلاں کر دے

چن تے سورج پانی بھر دے

(ڈاکٹر رشید انور)

اوکھے لفظاں دے معنے

لفظ	معنے	لفظ	معنے	لفظ	معنے
نیاری	انوکھی	وَ ن سوئی	طراں طراں دی	چھلاں، لہراں دا	معنے
صحرا	ریگستان، تھل	واٹاں	رستے، پینڈے، سفر	اُتار چڑھا	معنے

مشق

- 1- شاعر نے رب دیاں جیہڑیاں قدرتاں، مثالاں دے کے بیان کیتیاں نیں اوہناں وچوں چار مثالاں اپنے لفظاں وچ بیان کرو۔
- 2- حمد دے سارے شعراں نوں آسان نثر وچ لکھو۔

پیارے نبی صلی اللہ علیہ وآلہ وسلم

بچو! پہلا کلمہ تے تہانوں چنگی طراں یاد ہووے گا یعنی لَا إِلَهَ إِلَّا اللَّهُ مُحَمَّدٌ رَّسُولُ اللَّهِ ایس کلمے دا مطلب ایہہ وے کہ ”رب دے سوا کوئی ہووے عبادت دے لائق نہیں تے محمد صلی اللہ علیہ وآلہ وسلم اللہ دے رسول نیں“

اللہ دے رسول ساڈے پیارے نبی صلی اللہ علیہ وآلہ وسلم آج توں چوداں سو ورہے پہلاں 22 اپریل 571ء نوں ملک عرب دے شہر مکہ شریف وچ پیر وار دی سوہنی سویر نوں پیدا ہوئے۔ اوہناں دی والدہ دانان حضرت بی بی آمنہ سی۔ والد دانان حضرت عبد اللہ تے دادا جی دانان حضرت عبد المطلب سی، جیہڑے کہ عرب دیس دے مشہور قبیلے قریش دے سردار سن تے خانہ کعبہ دی دیکھ بھال ایس قبیلے دے ای سپرد سی۔

ساڈے پیارے رسول حضرت محمد صلی اللہ علیہ وآلہ وسلم دے پیدا ہون توں کجھ مہینے پہلاں ای اوہناں دے والد حضرت عبد اللہ رب نوں پیارے ہو گئے سن۔ ایس کر کے اوہناں دی دیکھ بھال اوہناں دے دادے حضرت عبد المطلب ہو راں نے کیتی۔ حضرت عبد المطلب نے آپ دانان محمد (صلی اللہ علیہ وآلہ وسلم) تے ماں نے احمد (صلی اللہ علیہ وآلہ وسلم) رکھیا۔

دیس عرب دے اُچے گھرانے اپنے بالان نوں پالن پوسن واسطے بڈو قبیلیاں دیاں عورتاں دیاں خدمتاں حاصل کردے سن۔ کیوں جے شہراں توں دور کھلیاں علاقیاں وچ پلن والے بال موسماں تے مصیبتاں دا بڑی دلیری نال مقابلہ کرناں سکھ لیندے سن تے اپنی بول چال ٹھیک طراں سکھ جاندے سن۔

بی بی حلیمہ سعدیہ نوں حضرت محمد صلی اللہ علیہ وآلہ وسلم دی تربیت کرن دی تے دُدھ پلاون دی عزت لہجی۔ ساڈے پیارے نبی صلی اللہ علیہ وآلہ وسلم آجے چھ (6) ورہیاں دے سن کہ اوہناں دی ماں حضرت بی بی آمنہ فوت ہو گئیاں۔ حضور صلی اللہ علیہ وآلہ وسلم دے دادے حضرت عبد المطلب ہو راں حضور صلی اللہ علیہ وآلہ وسلم نوں پالن پوسن دی ذمہ داری چک لئی پر اوہ وی صرف دو سال بعد ای رب نوں پیارے ہو گئے۔

ساڈے پیارے رسول صلی اللہ علیہ وآلہ وسلم نکلیاں ہوندیاں توں ای بڑے خوش مزاج، صفائی پسند، محنتی، ہمیش سچ بولن والے تے ایماندار سن، ہمیش انصاف دی گل کردے سن۔ رحم دلی تے ہمدردی اوہناں دی عادت سی۔ ضرورت منداں دی ضرورت پوری کرنا تے بے سہاریاں نوں سہارا دینا اپنا فرض سمجھدے سن۔ وڈیاں دی عزت کردے تے چھوٹیاں نال پیار کردے سن۔

ساڈے سوہنے نبی صلی اللہ علیہ وآلہ وسلم نوں بتاں دی پوجا چنگی نہیں سی لگ دی۔ اوہ صرف اک رب دی عبادت کرن دی تلقین کردے سن۔

مکہ شریف دے نیڑے اک پہاڑ اے جیہدی ٹیسی اُتے اک غار اے۔ اوہنوں ای ”غارِ حرا“ کہیا جاندا اے۔ حضور صلی اللہ علیہ وآلہ وسلم اوس غار وچ جا کے کئی کئی دن عبادت تے سوچ وچا کر دے سن۔ اک راتیں رب نے اپنے فرشتے جبریل علیہ السلام نوں پیارے نبی صلی اللہ علیہ وآلہ وسلم کول وحی (یعنی پیغام) دے کے بھیجیا۔ فرشتے نے حضور صلی اللہ علیہ وآلہ وسلم نوں دسیا کہ رب نے اوہناں نوں اپنا رسول بنایا اے۔ فیر حضور صلی اللہ علیہ وآلہ وسلم تے وحی آؤندی رہی تے آپ صلی اللہ علیہ وآلہ وسلم لوکاں نوں اسلام دی دعوت دیندے رہے۔ سبھ توں پہلاں اوہناں دی زندگی دی ساتھی حضرت خدیجہ رضی اللہ تعالیٰ عنہا نے اسلام قبول کیتا۔ اوہناں توں مگروں حضرت ابوبکر صدیق رضی اللہ تعالیٰ عنہ، حضور صلی اللہ علیہ وآلہ وسلم دے چچیرے بھرا حضرت علی مرتضیٰ رضی اللہ تعالیٰ عنہ تے آزاد کیتے ہوئے غلام حضرت زید رضی اللہ تعالیٰ عنہ نے ایمان لیا ندا۔



غارِ حرا

حضور صلی اللہ علیہ وآلہ وسلم نے ایہہ تعلیم دتی کہ اک رب دی عبادت کرو، کسے تے ظلم نہ کرو، غریباں تے ماڑیاں دا دکھ وٹڈو، کسے نوں رب دا شریک نہ بناؤ، بُت نہ پوجو، یتیمیاں تے رحم کرو، اک دوجے نال ہمدردی کرو، رشتے داراں نال چنگا سلوک کرو تے سبھ نوں برابر سمجھو۔ آپ صلی اللہ علیہ وآلہ وسلم فرماندے سن نیکی دا بدلہ نیکی تے برائی دا بدلہ بُرا ای ملدا اے۔ حضور صلی اللہ علیہ وآلہ وسلم نے دسیا کہ اسلام سچائی، ایمان داری، امن تے محبت دا پیغام دیندا اے۔ اسلام جھگڑے تے فساد نوں روکدا اے۔ ظلم دے خلاف جہاد کردا اے، غلاماں تے لونڈیاں نال ظلم کرن توں منع کردا اے۔ وعدہ پورا کرن تے برابری دی تعلیم دیندا اے۔ اسلام وچ وڈے چھوٹے، امیر غریب یاں کالے گورے وچ کوئی فرق نہیں۔ سبھ دے برابر حقوق نیں۔

حضور صلی اللہ علیہ وآلہ وسلم ساری حیاتی ایسے تعلیم دیندے رہے۔ کافراں نے آپ صلی اللہ علیہ وآلہ وسلم سے بڑے ظلم کیے۔ ڈھیر تکلیفیں وی دتیاں پر آپ صلی اللہ علیہ وآلہ وسلم اللہ دا پیغام لوکاں تک پہنچاندے رہے۔ اخیر جدوں کافراں ولوں شرارتاں بوہت ودھ گئیاں تے اللہ پاک دے حکم موجب حضور صلی اللہ علیہ وآلہ وسلم ہجرت کر کے مکے توں مدینے تشریف لے گئے۔ مکے دیاں لوکاں فیرووی آپ نوں تنگ کرنا نہ چھڈیا۔ سگوں مدینے تشریف تے حملہ کردتا۔ بدر دی جنگ، اُحد دی جنگ، خندق دی جنگ بڑیاں مشہور جنگاں نیں۔ رب نے اخیر مسلماناں نوں فتح دتی تے ہجرت دے اٹھ (8) ورہیاں مگروں حضور صلی اللہ علیہ وآلہ وسلم نے مکہ وی فتح کر لیا۔

مکہ فتح کرن توں بعد حضور صلی اللہ علیہ وآلہ وسلم نے عام معافی دا اعلان کر کے لوکاں دے دلاں نوں جت لیا۔ چو فیروے لَا إِلَهَ إِلَّا اللَّهُ مُحَمَّدٌ رَّسُولُ اللَّهِ تے اللہ اکبر دے نعرے گوئج پئے تے اسلام دا ڈنکا و جن لگ پیا۔

وصال ویلے حضور صلی اللہ علیہ وآلہ وسلم دی عمر تریسٹھ (63) ورہے سی۔ حضور صلی اللہ علیہ وآلہ وسلم اپنی امت واسطے اللہ دی اتاری ہوئی کتاب قرآن مجید اک اٹل قانون دی شکل وچ عطا کر گئے تاں جے مسلمان ہر مشکل ویلے ایس کتاب کولوں ہدایت حاصل کرن تے دنیا اٹے کامیاب تے سکھ دی زندگی گزارن۔

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
اللہ نوں پیارے ہونا	فوت ہو جانا	بُت	مٹی یا پتھر دیاں مورتاں	کو جھے	بد صورت	ٹہیسی	اُچی چوٹی
حیاتی	زندگی	اٹل	پکا، کدی نہ بدلن والا	تلقین کرنا	نصیحت کرنا	گوہ کرنا	غور کرنا، سوچنا
ہجرت	اک تھاں چھڈ کے دوجی تھاں چلے جانا	وحی	خدا ولوں نبی نوں سنہیا	وصال	وفات	گوئج	گردش والی آواز

مشق

- 1- حضور صلی اللہ علیہ وآلہ وسلم کیہڑے شہر وچ پیدا ہوئے۔ حضور صلی اللہ علیہ وآلہ وسلم دے والد، والدہ تے دائی دانان لکھو؟
- 2- حضور صلی اللہ علیہ وآلہ وسلم دی نبوت تے سبھ توں پہلاں کئے ایمان لیا ندا سی؟
- 3- حضور صلی اللہ علیہ وآلہ وسلم نے لوکاں نوں کیہ تعلیم دتی؟ آسان لفظاں وچ بیان کرو۔
- 4- قرآن پاک بارے تسیں کیہ جانندے او؟ بیان کرو۔

نعت

پاک محمد صلی اللہ علیہ وسلم جگ دا والی
 خلق پیارا جیہدا انملاً
 راکھا کمزوراں دے حق دا
 جس نے کفر ہنیری اندر
 جس دے خدمتگار فرشتے
 دنیا دے وچ چانن ونڈے
 پاوے ٹھنڈ دلاں دے اندر
 نسلوں اُچّا ، وصفوں عالی
 مہر مروّت جیہدی نرالی
 عدل انصاف دے باغ دا مالی
 حق سچ والی پتی بالی
 جس دے در سلطان سواہی
 جس سوہنے دی کملی کالی
 جس دے روضے پاک دی جالی

تائبَ جس دے دروازے توں

مانگت مڑیا کدے نہ خالی

(حفظ تائبَ)

اوکھے لفظاں دے معنے

لفظ	معنے	لفظ	معنے	لفظ	معنے
وصف	صفت	انملاً	جیہدی قیمت کوئی ادانہ کر سکدا ہووے	مہر	محبت، پیار
در	بوہا	مانگت	منگن والا	مروّت	احسان
خدمت گار	خدمت کرن والے				

مشق

-1 شاعر نے حضور صلی اللہ علیہ وآلہ وسلم بارے کیہ دسیا اے؟ بیان کرو۔

-2 ایس نعتوں زبانی یاد کرو۔

ایثار تے قربانی

حضور صلی اللہ علیہ وآلہ وسلم کجھ صحابیاں دے نال تشریف فرما سن۔ اک صحابی ایس پاک محفل وچ آیا۔ اوہ جھکھ نال پریشان سی۔ آپ صلی اللہ علیہ وآلہ وسلم نے تمام امہات المؤمنین رضی اللہ تعالیٰ عنہما توں پتا کیتا پر کسے کولوں کوئی شے کھان لئی نہ ملی۔ حضور صلی اللہ علیہ وآلہ وسلم نے صحابیاں نوں فرمایا ”تھاڑے وچوں کوئی صحابی ایس نوں اک دن واسطے مہمان بنان لئی تیار اے؟“ حضرت ابوطلمحہ انصاری رضی اللہ تعالیٰ عنہ نے حضور صلی اللہ علیہ وآلہ وسلم دے فرمان اُتے آمین آکھی۔ ایس توں بعد اوہنوں اپنے گھر لے گئے۔ گھر جا کے پتا چلیا پئی اکو بندے جوگا ای کھانا اے۔ اوہناں اپنے بچیاں نوں ورچا کے بھکھیاں ای سوادیتا۔ بیوی وی بھکھی رہی۔ آپ جدوں مہمان نال کھانا کھان بیٹھے تے اوہناں دی بیوی نے اوہناں دے آکھن موجب کسے بہانے دیوا بچھا دیتا۔ ہنیرے وچ حضرت ابوطلمحہ رضی اللہ تعالیٰ عنہ صرف مونہہ ہلاندا رہے تے مہمان صحابی نے رج کے کھانا کھالیا۔ اللہ تعالیٰ نوں اوہناں دی ایہہ قربانی بوہت پسند آئی تے اک آیت پاک نازل کر کے اوہناں دے ایس عمل نوں سلاہیا۔

ایس طراں دے واقعییاں نال اسلامی تاریخ بھری ہوئی اے۔ اک ہور مشہور واقعہ اے: حضرت خالد بن عقبہ رضی اللہ تعالیٰ عنہ نوں لوڑ پئی تاں اوہناں اپنا مکان اپنے ہمسائے حضرت عبداللہ بن عامر رضی اللہ تعالیٰ عنہ، کول وچ دیتا۔ اوہناں دے گھر دے جیاں نوں جدوں پتا لگا تاں اوہناں نے رونا تے افسوس کرنا شروع کر دیتا۔ ایس گل دی خبر حضرت عبداللہ بن عامر رضی اللہ تعالیٰ عنہ، نوں وی ہو گئی۔ اوہناں کولوں ایہہ صدمہ برداشت نہ ہویا۔ اوہناں نے حضرت خالد رضی اللہ تعالیٰ عنہ نوں سنیہا بھیج دیتا جے اوہ ایہہ مکان چھڈ کے کرائے دے مکان وچ نہ جان۔ ایہہ مکان وی اوہناں دا ای اے تے جیہڑی رقم اوہناں نوں دتی گئی اے، اوہ وی اوہناں کولوں واپس نہیں لئی جاوے گی۔

دین اسلام نے مسلماناں نوں اک دوجے دی بہتری تے بھلائی لئی ایہو جیہہ جذبے تے قربانی دی ای تعلیم دتی اے۔ حقیقت وی ایہو ای اے تے کائنات دا نظام وی ایہو جیہہ جذبیاں نال ای چلدا اے۔ زکوٰۃ مال دی قربانی سکھاؤندی اے۔ نماز اللہ دی راہ وچ وقت قربان کرنا دسدی اے۔ حج لئی گھر دا آرام چھڈنا تے مال وی خرچ کرنا پیندا اے۔ جہاد وچ جان دی قربانی پیش کیتی جاندی اے۔ قربانی دا جذبہ دین دی روح ہوندا اے۔ اوہدے وچ ای دین، ملت تے وطن دی بہتری تے بھلائی ہوندی اے۔

اوکھ لفظاں دے معنے

معنے	لفظ	معنے	لفظ	معنے	لفظ
بہلا کے	ورچا کے	پیغام	سُنہیا	رسول پاک صلی اللہ علیہ وآلہ وسلم دی محفل	صحابی
گوانڈھی	ہمسائے	مطابق	موجب	وچ پیٹھن والا مسلمان	

مشق

- 1- بھکھ نال پریشان صحابی نوں کیہڑے صحابی اپنے گھر لے گئے سن؟
- 2- قربانی دا جذبہ تو ماں دی زندگی واسطے کیوں ضروری اے؟
- 3- نماز، زکوٰۃ، حج تے جہاد وچ کیہڑیاں چیزاں قربان کرن دی تعلیم ملدی اے؟

قائد اعظم رحمۃ اللہ علیہ



اوہ ہمت ، شرافت ، محبت دا پتلا
اوہ عظمت ، ذہانت ، صداقت دا پتلا

—○—

جواں سوچ اوہدی بڑا کم دکھایا
تے ڈُٹی ہوئی قوم نوں پار لایا

—○—

وطن دا ہے بانی تے جت دا راہی
زمانے دی تاریخ دیوے گواہی

—○—

اوہ جرأت ، شجاعت تے ہمت دا گہنا
عطا چھینے کیتا اُخوت دا گہنا

—○—

عمل نال بیڑی آزادی دی تاری
رہوے فیض اوہدا حشر تیک جاری

—○—

(غلام مصطفیٰ بھٹو)

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
اُخوت	ایرکھا، بھائی چارا	عطا	بخشش	فیض	بھلیائی	بانی	نینہہ رکھن والا

مشق

- 1- قائد اعظم کیہڑیاں خوبیاں دے مالک سن؟
- 2- تاریخ قائد اعظم دے کیہڑے کارنامے دی گواہی دیندی اے؟

ساڈی صحت

زندگی واسطے صحت تے تندرستی دی حفاظت ساڈے تے فرض اے کیوں جے بے احتیاطی تے لاپرواہی نال صحت دے ضائع ہون دا خطرہ ہوندا اے۔ ایس واسطے سانوں چاہیدا اے پئی صحت لئی سیانیاں نے جیہڑے اصول بنائے نیں اوہناں تے عمل کر کے صحت تے تندرستی دی ائمٹی دولت نوں ضائع نہ ہون دیئے۔

غذا زندگی تے صحت واسطے بڑی ضروری تے مڈھلی شے اے۔ کھانا ہمیشہ سادہ کھانا چاہیدا اے تے ہر بُر کی چتھ چتھ کے کھانی چاہیدی اے۔ کھانا وقت نال کھانا چاہیدا اے تے بھکھ توں بغیر روٹی بالکل نہیں کھانی چاہیدی۔ انج ہاضمے دا سارا نظام خراب ہو کے جسم وچ بیماری تے خرابیاں پیدا کر دیندا اے۔

نیندروی صحت واسطے بڑی ضروری چیز اے۔ جے کر نیند رپوری نہ ہووے تے جسم تھکن محسوس کر دا اے تے اوہدی طاقت تے چُستی وچ فرق آجاندا اے۔ ایس واسطے جسم دے آرام لئی ست (7) اٹھ (8) گھنٹے دی نیند بڑی ضروری اے۔

جسم دی تازگی تے چُستی لئی ورزش وی بڑی ضروری اے۔ ورزش کھلے میدان تے تازہ ہوا وچ باقاعدگی نال کرنی چاہیدی اے۔ کھلے میدان وچ ساہ لین نال پھیپھڑیاں وچ آکسیجن بھر جاندی اے جیہدے نال جسم دے زہر پیلے تے نقصان پچان والے مادے ضائع ہو جاندے نیں تے خون صاف ہو جاند اے۔

روز سویرے اٹھ کے غسل کرن نال جسم بیماریاں توں محفوظ رہندا اے۔ ایہدے نال صفائی تے پاکیزگی وی حاصل ہوندا اے تے خون دا دورہ وی تیز ہوندا اے۔ نہا کے سر وچ تیل دی مالش کرنا دماغ تے والاں واسطے بڑا مفید اے۔

صبح شام دندان دی صفائی کرن دی عادت دندان نوں خراب نہیں ہون دیندی، ایس کر کے دندان نوں صبح شام صاف کرنا چاہیدا اے۔ مسواک دندان نوں صاف کرن لئی سمجھ توں چنگی چیز اے۔ برش تے منجن وی استعمال کیتے جاسکدے نیں۔

ناخن صاف تے ستھرے رکھنے چاہیدے نیں۔ جے کر ناخناں وچ میل ہووے گی تے اوہ ساڈی خوراک دے نال معدے وچ جائے گی تے انج زہر پیلے تے نقصان پچان والے مادے پیدا ہو کے بیماریاں پیدا کرن گے۔ ایس لئی ناخن ہفتے وچ اک دو وار ضرور کٹنے چاہیدے نیں۔

اکھاں قدرت دا ائمٹا تے بوہت وڈا تحفہ نیں۔ کسے انھے بندے نوں چُچھ ویکھو پئی اکھاں کڈی وڈی نعمت نیں۔

ایہدے باوجود اسیں اکھاں دی حفاظت ول کوئی توجہ نہیں دیندے۔ گھٹ روشنی وچ پڑھن لکھن یا سین پروں داکم نہیں کرنا چاہیدا۔ پڑھن لکھن ویلے روشنی کجے ہتھ ہونی چاہیدی اے۔ سبے پاسے یاں ساہمنے روشنی ہون نال اکھاں نوں بڑا نقصان ہوندا اے۔ کتاب یا کاغذ کم از کم دس بارہ (10-12) سینٹی میٹر دے فاصلے تے ہونے چاہیدے نیں۔ لیٹ کے یا چلدی سواری وچ بیٹھ کے تے کھانے دے دوران وی پڑھن توں پرہیز کرنا چاہیدا اے۔ روز اکھاں نوں صاف تے ٹھنڈے پانی نال دھونا چاہیدا اے۔ ایہدے نال اکھاں دی میل کچیل صاف ہو جاندی اے۔ کھلے تے سرسبز میدان وچ صبح شام سیروی اکھاں واسطے مفید اے۔ تیز دھپ وچ، مٹھے رنگ دا چشمہ لانا چاہیدا اے۔ گھٹ غذا تے خراب ہوا نال وی اکھاں تے بُرا اثر پیندا اے۔ باریک کدھائی یا پڑھائی دیر تک نہیں کرنی چاہیدی۔ اکھاں دی حفاظت تے صحت بارے ایہناں گلاں تے عمل کرنا بڑا ضروری اے جے اسیں سُستی کراں گے تے جسم دی مشین وی کم کرنا بند کر دیوے گی۔ ایس لئی سانوں چاہیدا اے پئی صحت بارے دسیاں گئیاں گلاں اُتے عمل کر کے صحت تے تندرستی دی دولت دی حفاظت کریئے تاں جے سانوں ڈاکٹراں، حکیمان دا گھٹ محتاج ہونا پئے۔

اوکھے لفظاں دے معنے

لفظ	معنے	لفظ	معنے	لفظ	معنے
مڈھلی شے	پہلی چیز، پہلی گل	انملا	جیہدی قیمت نہ دئی	بایاں	کھتا
سجّا	دایاں	جاسکدی ہووے	نوالہ، لقمہ	عینک	چشمہ
		بُرکی		گھٹ گوڑھا رنگ	مٹھا رنگ

مشق

- 1- سانوں اپنی صحت ٹھیک رکھن لئی کیہ کرنا چاہیدا اے؟
- 2- دند کیوں صاف رکھنے چاہیدے نیں؟
- 3- چنگی صحت واسطے ورزش کیوں ضروری اے؟
- 4- صحت تے تندرستی دی حفاظت کرنی کیوں ضروری اے؟

وطن دی حفاظت

امجد نے ٹھنڈتوں بچن لئی اپنے چاچا جی دی منجی اُتے چڑھ کے لیف دی بکل مارلی تے چاچا جی نوں آکھن لگا:
”چاچا جی! اِنج تسیں مینوں سبق نہیں پڑھاؤ گے؟“

”کیوں نہیں پُتر! میں عشا دی نماز پڑھ لوں فیر تینوں سبق پڑھاواں گا۔“
چاچا جی جدوں نماز پڑھ کے ویہلے ہوئے تے امجد دے نال ای لیف دی بکل وچ آ بیٹھے۔ امجد نے چھیتی نال پُچھیا:
”چاچا جی! چن تارے رُ دیاں رُ دیاں تھکدے نہیں؟“
”نہیں بیٹا! ایہہ نہیں تھکدے۔“

”کیوں نہیں تھکدے؟ میں تے سکول جاندا ہو یا تھک جانا واں۔“
”انج دی پُتر وڈا ہو ویں گاتے تینوں سمجھ آوے گی پئی چن تارے نہیں رُ دے، سگوں زمین رُ دی اے۔“
”چاچا جی کدے زمین وی رُی اے؟ ایہہ تاں اک تھان کھڑی اے۔“ امجد نے بھولے جیہے مونہہ نال پُچھیا۔
”کھڑی نہیں پُتر، گھمدی اے، لاٹو وانگ، چاچا جی نے دسیا۔
”اوہ کویں؟“ امجد نے فیر پُچھیا۔

ایہہ ساری گل پُتر میں تینوں کل سمجھاواں گا۔ ہن توں کتاب کھول تینوں سبق پڑھاواں“
امجد نے کتاب کھول کے جدوں چاچا جی اُتے رکھی تے پُچھن لگا، ”چاچا جی! ایہہ گل وچ ایڈا وڈا تویت اِنج کیوں
پایا جے تہانوں وی ڈر لگدا اے؟“

چاچا جی کھڑ کھڑا کے ہَس پے تے آکھن لگے، ”نہیں پُتر! ایہہ تویت نہیں، ایہہ تے بہادری دا تمنغہ اے“
”تسیں ایہہ کتھوں خریدیا اے؟“ امجد نے پُچھیا۔
”نہیں کا کا خریدیا نہیں، ایہہ مینوں سرکار نے دیتا سی۔“
”تہانوں کیوں دیتا سی چاچا جی؟“

”پُتر! ایہہ مینوں اودوں ملیا سی جدوں میں تیرے نالوں چار (4) ورہے وڈا ساں کہ اک دن نماشاں ویلے دشمن اپنی
جُوہ چھڈ کے ساڈی جُوہ وچ آوڑیا تے پنڈ دے نیڑے مورچے لالنے۔“
”تے پنڈ والیاں نے نہ ڈکیا؟“ امجد نے پُچھیا۔

”پنڈ دے سارے نکلے وڈے لاگلے پنڈ وچ جھونے دی لاب لان گئے ہوئے سن۔ میں تے میرا اک یار جیجا کھیڈ رہے ساں کہ اچن چیت گولیاں چلن دی واج آئی۔“

”چاچا جی تہا نوں ڈرنہ لگا؟“

”ڈرتے لگا، جیجائے نس کے اپنے گھر جا وڑیا، پر میں سوچیں پے گیا کہ ہُن دشمن سارے پنڈ نوں لٹ کے لے جاوے گا۔ کندھاں کوٹھے ڈھا دیوے گا۔ مال ڈنگر کھول کے لے جاوے گا۔ کیہ کیتا جاوے؟“

”فیرتیں کیہ کیتا چاچا جی؟“

”پہلاں تے میں کوٹھے تے چڑھ کے اپنے ابے نوں واجاں ماریاں، پر شاہ پورکتے نیڑے سی؟ ادھ کوہ تے وڈی نہر، تے نہر توں اگے چار (4) مربعے، بس پُتر امجد! میرے ذہن وچ اک ترکیب آئی۔ میں چلھانی وچوں تیلیاں دی ڈبی چھکی، پنڈوں باہر نس پیاتے رحمت دے کھوہ اُتے کپاہ دیاں چھٹیاں دی اک وڈی ساری ون نوں اگ لادتی۔“

”اگ لادتی؟ ایہہ کیوں چاچا جی؟“ امجد نے حیران ہو کے پچھیا۔

”توں آپے امی سمجھ جاویں گا کہ اگ کیوں لائی سی۔ بس اگ دا بھانڈیڑی پیا۔ دھوئیں دے بدل آسمانی چڑھ گئے تے اگ دی لاٹ درختاں نالوں وی اُچی نکدی سی۔“

”چاچا جی! ایہہ کم تیں بڑا مند کیتا۔ وچارے رحے داسارا بالن ای ساڑ دتا۔ اوس نے سیال نوں کیہ بالیا ہووے گا؟“ امجد سوچیں پے گیا۔

”میں دسناں کا! میں کھوہ توں کہی چھکی تے نہر نوں پنڈول نکا دے دتا۔“

”جی! ایہہ کم تیں بڑا مند کیتا۔ نہر داسارا پانی پنڈ وچ آوڑیا ہووے گا۔“

”میں ایہو ای تے چاہندا ساں پُتر!“

”کیوں؟“

”اگ دا بھانڈیڑی ویکھ کے پنڈ دے سارے لوکی نئے خورے پنڈ نوں اگ لگ گئی اے تے جدوں نہر تے آئے تے میں دشمن دیاں فوجاں دے آون دی گل سنائی۔“

”تے فیر کیہ ہو یا چاچا جی؟“

”نہر دا پانی ایناں تیز سی پئی پنڈ وچوں ہوندا ہو یا دشمن دیاں مورچیاں وچ جاوڑیا۔ دشمن دے ٹینک اگا نہہ نہ ودھ سکے۔ اینی دیرو وچ پنڈ دے لوکاں نے سرکار نوں جادسیا تے پاکستانی فوج مددئی آگئی۔“

”دشمن پانی وچ ڈب گیا؟“ امجد نے پچھیا۔

”بس ڈردا مارا پچھا نہہ ہٹ گیا۔ اگا نہہ پانی وچ کیوں آوندا؟“

”اچھا چاچا جی تے فیر؟“

”فیرکیہ، دشمن داوس نہ چلیا تے اپنے ملک دی جوہ ول پرت گیا۔“

”تہانوں چا چاجی ایڈا وڈا تویت کیہنے دیتا؟“

چا چاجی امجدی ایس گل تے ہس پے تے آکھن لگے ”جدوں سرکارنوں ایہہ پتالگا کہ نکلے جیہے منڈے نے پنڈتے ملک دی حفاظت لئی ایڈی سمجھ تے دانائی داکم کیتا اے تے اوہنے مینوں بہادری داتمنغہ دیتا تے ایہدے نال اک مربع زمین وی دتی۔“

امجد کہن لگا ”فیر میں وی ایہہ تمنغہ لواں گا چا چاجی۔“

”کیوں نہیں پتر! توں وی لوں۔ توں پڑھ لکھ کے جدوں بہادری دے کم کریں گاتے ضرور ملے گا۔“

”تے فیر چا چاجی، مینوں چھیتی چھیتی سبق پڑھاؤ۔“ امجد نے کتاب کھول لئی۔

”ہاں پڑھ پتر، اللہ سبھ دارا کھاتے سبھ دا پالن ہارے۔“

اوکھے لفظاں دے معنے

لفظ	معنے	لفظ	معنے	لفظ	معنے
بکل مارنا	کپڑے نوں بدن دے دوالے ولیٹ لینا	تمغہ	بہادری دے بدلے وچ حکومت ولوں دتا ہوا نشان	نماشاں	شاماں ویلے
جھونا	چولاں دی فصل	لاٹ	اگ داشعلہ	مورچے	لڑائی لئی لگن دے تھاں جیہڑے زمین پٹ کے بنائے جان دے نہیں
ون	کسے کئی ہوئی فصل دا ڈھیر	اچن چیت	اچانک	گوہ	دھیان
چلھانی	باورچی خانہ	پالن ہار	پالن والا	راکھا	حفاظت کرنے والا

مشق

- 1- چا چاجی نے کیہڑا کارنامہ کیتا سی کہ حکومت نے اوہناں نوں تمنغہ دتا؟
- 2- سانوں ایہہ کہانی کیہ سبق دیندی اے؟ آسان لفظاں وچ بیان کرو۔
- 3- امجد نے چا چاجی دی کہانی سن کے کیہ آکھیا؟

تاریاں نے اک پنڈ، وسایا

تاریاں نے اک پنڈ، وسایا چندا ماما ویکھن آیا

دکھن پر بت چڑھدے لہندے

لاٹاں مارن اٹھدے بیہندے

رل مل تارے پنڈ وچ رہندے

پیار دا سبھ نے سبق پکایا

تاریاں نے اک پنڈ، وسایا چندا ماما ویکھن آیا

جگمگ جگمگ کردے سارے

جھلمل جھلمل کھان ہلارے

ڈلھکاں مارن کوٹاں چارے

ویڑا امبر دا لشکایا

تاریاں نے اک پنڈ، وسایا چندا ماما ویکھن آیا

آؤ اسیں وی اک ہو جائیے

اک دوجے نوں سینے لایے

رل کے پاکستان وسایے

قائد اعظم نے فرمایا

تاریاں نے اک پنڈ، وسایا چندا ماما ویکھن آیا

(اقبال صلاح الدین)

اوکھے لفظاں دے معنے

لفظ	معنے	لفظ	معنے
دکھن پر بت	جنوب شمال	کوٹاں چارے	چارے پاسے

مشق

1. تاریاں دے پنڈ وساون توں سانوں کیہ سبق ملدا اے؟

2. اوس پنڈ وچ سبھ نے کیہ سبق پڑھیا سی؟

مسلمان دا انصاف

سبھ توں اُچے تے سچے مذہب اسلام دا حکم اے کہ اپنے پرانے سبھ دے نال انصاف کرو تے کسے وی حال وچ جھوٹھے آدمی دا ساتھ نہ دیو۔ جیہناں لوکاں نوں اللہ تعالیٰ نے عقل تے ایمان دانور دیتا اے، اوہ ایس گل اُتے پورا پورا عمل کردے نیں، تاں جے ساڈے اُتے اللہ تے رسول صلی اللہ علیہ وآلہ وسلم راضی رہن۔

حضرت علی کرم اللہ وجہہ دی زندگی دا اک واقعہ اے کہ اک یہودی نے آپ دی زرہ چوری کر لئی۔ جدوں اوہ یہودی چوری دی زرہ بازار وچ بیچ رہیا سی، اللہ ولوں حضرت علی کرم اللہ وجہہ او تھے آگئے۔ اوہناں اپنی زرہ پچھان لئی تے یہودی نوں اوسے ویلے پھڑ لیا۔ حضرت علی کرم اللہ وجہہ جے چاہندے تے اوس یہودی نوں اوسے ویلے وڈی توں وڈی سزا دے سکدے سن، پر آپ نے اپنے اختیار توں فائدہ نہ اٹھایا تے عام لوکاں دی طراں قاضی دی عدالت وچ مقدمہ کردتا۔ اوس ایماندار قاضی نے وی ایس مقدمے دا فیصلہ پورے انصاف نال کیتا۔ قاضی نے حضرت علی کرم اللہ وجہہ نوں آکھیا: ”جے ایہہ تہاڈی اے تے کوئی ایہو جیہا گواہ لیاؤ، جیہڑا ایس گل دی شہادت دیوے کہ تسیں سچ آکھرہے او۔“

قاضی دی ایہہ گل سن کے حضرت علی کرم اللہ وجہہ نے آکھیا: ”ایس گل دی گواہی میرا پتر حسن دے سکدا اے۔“ بھانویں حضرت علی کرم اللہ وجہہ ہر طراں نال ایس قابل سن پئی اوہناں دی گل من لئی جاوے، پر شریعت وچ کسے نزدیکی رشتے دار نوں گواہ نہیں بنایا جاسکدا۔ کیوں جے ایہدے وچ شک ہو سکدا اے پئی گواہ اپنے تعلق دی وجہ توں جھوٹھ بول رہیا اے۔ ایس لئی قاضی نے ایہہ گواہی قبول کرن توں انکار کر دیتا تے حضرت علی کرم اللہ وجہہ نوں آکھیا: ”تسیں حضرت حسن رضی اللہ تعالیٰ عنہ دے علاوہ کوئی ہو رگواہ لیاؤ۔“ جے کوئی ہو ر ہوندا تے خورے کئے جھوٹھے گواہ بھگتا دیندا، پر حضرت علی کرم اللہ وجہہ نے قاضی نوں آکھیا۔ ”جناب میرے پتر حسن (رضی اللہ تعالیٰ عنہ) توں بغیر کسے ہو شخص نوں ایس گل دا پتا نہیں پئی ایہہ زرہ سچی مچی میری اے۔ ایس لئی میں کوئی ہو رگواہ پیش نہیں کر سکدا۔“

حضرت علی کرم اللہ وجہہ دا جواب سن کے قاضی نے آکھیا ”جے تسیں گواہ پیش نہیں کر سکدے تے فی زمینوں بڑا ہرکھا اے جے ایہہ زرہ میں تہا نوں نہیں دو سکدا۔ میرا فیصلہ ایہہ اے کہ ایہہ زرہ جیہدے کول اے، اوسے دی اے، تہاڈا ایس زرہ تے کوئی حق نہیں۔“

حضرت علی کرم اللہ وجہہ نے ایہہ فیصلہ کھلے دل نال قبول کر لیا تے آکھیا ”ٹھیک اے جے انصاف ایہہ کہیندا اے تے مینوں قبول اے“۔ قاضی دا فیصلہ تے حضرت علی کرم اللہ وجہہ دا جواب سُن کے یہودی دی انسانیت جاگ پئی۔ اوہنے عدالت وچ کھلوتیاں کھلوتیاں آکھیا: میں سچی مچی چور آں تے ایہہ زہر حضرت علی کرم اللہ وجہہ ہوراں دی اے، ایہدے اُتے میرا کوئی حق نہیں۔ میں تہاڈے انصاف توں بڑا خوش آں تے میں چاہناواں کہ میں وی اوس قوم دا اک فرد بن جاواں، جیہڑی انصاف کرن لگیاں اپنا پرایا نہیں دیکھدی تے پورا پورا انصاف کردی اے اوسے ویلے اوہ یہودی مسلمان ہو گیا تے ساریاں برائیاں توں توبہ کر کے اک چنگے مسلمان ورگی زندگی گزارن لگ پیا۔

سانوں ساریاں نوں چائیدا اے کہ اسیں وی کچے مسلمان بنن دی کوشش کریئے۔ حق تے انصاف اُتے چلینے تاں جے ساڈا اللہ تے ساڈا سوہنا رسول صلی اللہ علیہ وآلہ وسلم ساڈے تے راضی رہن۔ رب سانوں انصاف دے رستے اُتے چلن دی ہمت تے توفیق دیوے۔ آمین

اوکھے لفظاں دے معنے

لفظ	معنے	لفظ	معنے
زہر	لوہے دیاں تاراں تے کڑیاں دا بنایا ہویا لباس جیہڑا جنگ ویلے پہنیا جاندا سی تاں جے تلوار وغیرہ دا وار اثر نہ کرے	قاضی	حج، منصف
		ہرکھ	افسوس

مشق

- 1- حضرت علی کرم اللہ وجہہ دی زہر کہینے چرائی سی؟
- 2- حضرت علی کرم اللہ وجہہ قاضی دی عدالت وچ بطور گواہ کہینوں پیش کیتا؟
- 3- قاضی نے کیہ فیصلہ کیتا؟
- 4- فیصلہ سن کے چور نے کیہ اعلان کیتا تے کیوں؟

وڈا انسان

رات ادھی توں بوہتی ہوگئی سی پر اکرم اُجے تک جاگ رہیا سی۔ اوہنوں عمران دے پیو دیاں کوٹیاں گلاں پریشان کر دیاں سن عمران دے پیو نے سویرے اوہنوں بڑا جھنب جھڑک کے آکھیا سی ”خبردار مڑ کے توں میرے منڈے نال پھر دا دسیا تے۔ توں اپنی اوقات نہیں دیکھدا!“ عمران دے پیو اُتے ہر ویلے دولت دا بھوت سوار رہندا سی۔ غریب آدمی اوہدی نظر وچ انسان نہیں سن۔ اوہدے لئی دولت ای دین تے دولت ای دنیا سی۔ ایس کر کے لوک اوہنوں چنگا نہیں سن سمجھدے۔

اکرم دا پیو ایک غریب مزدور سی پر اوہدے دل وچ لوکاں لئی پیار محبت تے ہمدردی ضروری۔ ایس کر کے لوک اوہدی بڑی عزت کردے سن۔

اکرم کول عمران وانگوں نویں نویں تے سوہنے سوہنے کپڑے نہیں سن۔ نہ ای عمران وانگوں اوہدے کول بوہتے پیسے ہوندے سن۔ اکرم دا پیو مہینے وچ ایساں کماندا وی نہیں سی، چتاں عمران اٹھوارے وچ خرچ کردیندا سی۔ امیری غریبی دے ایڈے وڈے فرق دے ہونداں اکرم تے عمران اک دوجے دے پکے یار سن۔ اکرم تے عمران دی یاری اُتے لوک حیران سن۔ کدی کدی اکرم وی ایس امیری تے غریبی دی سانجھ بارے سوچاں وچ گواچ جاندا۔ اوہنوں ایہہ یاری عجیب لگدی۔ اوہنے کئی واری اپنے پیو نال وی ایس گل دا ذکر کیتا۔ اوہدے پیو نے اوہنوں پیار نال سمجھانداں ہو یاں کہیا: ”پتر! بندہ سوہنا صرف چنگے کماں نال ہوندا اے۔ جے بندہ دل وچ برائی دی تھاں نیکی سچائی تے ہمدردی نوں سجا لوے تے دنیا وچ اوہدے نال دا چنگا کوئی نہیں ہوندا۔“

اکرم نے کہیا: ”اباجی! سکول دا چپڑا سی کہندا ہوندا اے۔ اکرم تیرا پیو سچا مزدور اے، بڑا نیک تے ایماندار اے۔ اک واری اک آدمی اوہنوں مزدوری دے پیسے دین مگروں اپنا بٹوہ بوجھے وچ پان لگاتے بٹوہ زمین تے ڈگ پیا۔ اوہدے وچ پنج (5) ہزار روپے سن۔ تیرے پیو دی نظر بٹوے تے پے گئی۔ اوہنے کچھ نرس کے بٹوہ اوس آدمی دے حوالے کر دتا۔“

اکرم دے پیو نے اوہنوں دسیا: ”پتر! ایماندار ی بندے دی سبھ توں وڈی دولت اے۔ ایماندار بندے توں خدا تے رسول صلی اللہ علیہ وآلہ وسلم خوش ہوندے نیں۔“

اکرم نے دل وچ پکا ارادہ کر لیا کہ او وی اپنے پیو وانگر محنت کرے گا۔ ماٹیاں دی مدد کرے گا تے کدی بے ایمانی نہیں کرے گا۔

عمران نوں ایہو جیہیاں گلاں دا کدی خیال وی نہیں سی آیا۔ کیوں جے اوہدے پیو نے کدی وی اوہنوں سمجھا یا نہیں سی۔

اوه سمجھانداوی کویں، اوہنوں پیسا کمان توں ویہل ملدی تے سمجھاؤندا۔ اک دن اکرم تے عمران سکول توں چھٹی ویلے گھراں نوں آرہے سن۔ راہ وچ اک چھابے والے دا چھاباٹا نکلے نال وچ کے سڑک تے ڈگ پیا۔ اوہدے کیلے، انار تے سب کھلر گئے۔ ایہہ ویکھ کے عمران نے زور زور نال ہسنا شروع کر دتا۔ پر اکرم اوہدا پھل اکٹھا کران لگ پیا۔ چھابے والے نے اکرم نوں دعاواں دتیاں۔ کجھ دور جا کے عمران نے اپنے بستے وچوں دو کیلے کڈھے۔ اک کیلا اکرم نوں دکھانیاں ہونیاں کہیا۔ ”کھاؤ بادشاہو! مفت دامال اے۔“ اکرم نوں بڑا دکھ ہویا۔ عمران دی ایس بھٹیڑی حرکت توں دوہاں وچ ناراضگی ہوئی۔

اکرم نوں ایہو جینے کم کر کے بڑی خوشی ہوندی، جیہناں نال دو جیاں دا بھلا ہووے پر عمران نوں ایہو جیہاں کماں نال کوئی مطلب نہیں سی۔ ویلے دے نال جیوں جیوں اوہ جوان ہوندے گئے اوہناں دیاں عاداتاں دی اپنا اپنا روپ دھار دیاں ہونیاں جوان ہونیاں گئیاں۔ عمران نے آوارہ گردی شروع کر دتی۔ ایہناں گلاں توں اکرم اوہنوں بوہت سمجھاندا رہیا۔ پر عمران ہس کے ٹال چھڈ دا۔

اخیر اکرم نے عمران نوں ملنا گھٹ کر دتا۔ پر ہن عمران ای اوہدے گھر جاندا تے اکرم نال گھر نہ آون دا گلہ کردا۔ آج چھٹی دا دن سی، عمران سویرے سویرے اکرم دے گھر آیا تے اوہنوں بدوبدی اپنے گھر لے گیا۔ اکرم نے عمران نوں پچھیا کیہ گل اے؟ عمران نے اوہدے کن وچ کجھ کہیا۔ اکرم سن کے گھبرایا تے اوہدا رنگ فق ہو گیا۔

”نہیں نہیں ایہہ نہیں ہوسکدا۔“ اکرم رون ہا کا ہو گیا۔ عمران نے سمجھاندا یاں ہونیاں کہیا: ”رشید تے نذیر وی ساڈے نال نیں۔“

اکرم ایہہ دونوں سن کے ہور وی پریشان ہو گیا۔ خدا جانے عمران دی ایہناں نال کویں دوستی ہوئی سی۔ اوہناں کتے چوری کرن دا پروگرام بنایا سی۔ عمران اکرم نوں وی ایس بھٹیڑے کم وچ ساتھی بناؤنا چاہندا سی، پر اکرم نے انکار کر دتا۔

عمران نے بڑا ٹل لایا پئی اکرم ساتھ دیوے، پر اکرم نہ منیا تے انکار کردا ہویا گھرنوں ٹریا۔ جدوں اوہ بوہے توں باہر نکلن لگا۔ اگوں عمران دا پیوئل گیا۔ اکرم نوں ویکھ کے اپنی عادت موجب اوہ اوہنوں جھڑکن لگ پیا۔ اکرم دیاں اکھاں وچوں اتھرو سم پئے تے بے وساجیہا ہو کے بولیا:

”چاچا جی! آج راتیں عمران نوں گھروں باہر نہ جان دینا۔“ ایہہ کہہ کے اکرم اپنے گھر ول ٹریا۔ گھرا پڑ کے اوہ بڑا ای پریشان سی۔ اوہ سارا دن تے ساری رات تڑفدا رہیا۔ اک پل لئی اوہنوں چین نہ ملیا۔ سوچاں وچ رات تک گئی۔ سورج نکل آیا۔ چڑیاں چوں چوں کرن لگ پیاں۔ اکرم منجی تے لیٹیا پاسے پرت رہیا سی کہ بوبا کھڑکن دی واج آئی۔ اوہنے اٹھ کے چھیتی نال بوبا کھولیا تے عمران دے پیونوں ویکھ کے حیران رہ گیا۔

”چاچا جی! تسیں؟“

”میںوں معاف کر دے پُتر! میں تینوں غلط سمجھیا سی۔“ عمران دے پیو دیاں اکھاں وچ اتھرو بھر آئے۔ ”میں تینوں مزدور دا پُتر سمجھ کے نفرت نال ویکھدا ساں۔ ہُن میںوں معلوم ہو یا اے کہ وڈا انسان اوہ نہیں ہوندا جیہدے کول بوہتی دولت ہووے۔ سگوں وڈا انسان اوہ ہوندا اے جیہڑا نیک تے اخلاق والا ہووے۔ توں اک سچے مزدور دا کرماں والا پُتر ایس تے عمران اک دولت مند پیو دا بد نصیب پُتر۔

اکرم بولیا: ”چا چا جی! گل کیہ اے۔“

عمران دے پیو نے اخبار اکرم نوں دیندیاں آکھیا: ”لے پڑھ لے اپنے یار دی کر توت۔“ اکرم نے اخبار کھولیا۔ پہلے ای صفحے تے لکھیا سی: ”دسویں جماعت دا طالب علم عمران اپنے دوسا تھیاں نال چوری کردا ہو یا پھڑیا گیا۔“

اکرم نوں ایہہ پڑھ کے بڑا دکھ ہو یا تے اوہ دیاں اکھاں وی ہنجواں نال بھج گئیاں۔

اوکھے لفظاں دے معنے

لفظ	معنے	لفظ	معنے	لفظ	معنے
کوڑیاں پھکیاں	غصے والیاں گلاں	سانجھ	دوستی تعلق	کرماں والا	چنگے نصیبیاں والا
جھڑک جھب	غصے ہونا	اٹھوار	اٹھ دن	ٹل	زور
ہنجو	اتھرو				

مشق

- 1- وڈا انسان ہون واسطے کہہناں چیزاں دی لوڑاے؟
- 2- اکرم نوں اوہ دے پیو نے کیہ نصیحتاں کیتیاں؟
- 3- ایس کہانی توں کیہ سبق ملدا اے؟
- 4- عمران وچ کیہ برائیاں سن؟

شوکا جدوں سکولے جاوے

شوکا جدوں سکولے جاوے
 ہتھ مونہہ دھو کے وال سجا کے
 یاراں کولوں اکھ بچا کے
 شوکا جدوں سکولے جاوے
 جیرا، پھیرکا، نتھو، ملا
 ایہہ کم عقلا شوکا جھلا
 شوکا جدوں سکولے جاوے
 بستہ کتے لکا کے رکھدا
 گڈی پھر کے کوٹھے چڑھدا
 شوکا جدوں سکولے جاوے
 سال دے مگروں پرچے ہوئے
 رو رو ہنجو ہار پروئے
 شوکا جدوں سکولے جاوے
 لے کے آون گیند تے بلا
 کھیڈاں دے وچ وقت گواوے
 دھوڑ تے گھٹا ہر دم پھکدا
 پیچے اُتے پیچا پاوے
 ہو یا فیل تے چھم چھم روئے
 نالے منڈیاں نوں سمجھاوے
 آج توں کوئی نہ پھٹا کھاوے
 (صدیق حل)

اوکھ لفظاں دے معنے

لفظ	معنے	لفظ	معنے	لفظ	معنے	لفظ	معنے
پھٹا کھانا	بھج جانا	چھم چھم روئے	زارو زار روئے	پرچے ہوئے	امتحان ہو یا	ہنجو	اتھرو، آنسو

مشق

- 1- شوکے نوں کیہڑیاں کیہڑیاں بڑیاں عاداتاں سن؟
- 2- شوکا کیوں فیل ہو یا؟
- 3- فیل ہو کے شوکے نوں کیہہ سبق ملیا؟

حضرت داتا گنج بخش رحمۃ اللہ علیہ

زاہد دے ابا جی کدھرے واہنڈے جارہے سن۔ زاہد نے اپنی ماں نوں پچھیا کہ ابا جی کتھے چلے نیں؟ ماں نے دسیا پئی ”تیرے ابا جی لاہور داتا صاحب دے عرس تے جارہے نیں“ زاہد نے رٹا پا دیتا کہ مینوں وی نال کھڑو۔ اوہدی ضد پاروں ماں نے اوہنوں وی تیار کر دیتا تے اوہدے ابا جان اگے نال لے جان دی سفارش کیتی۔ گھروں ٹر کے دونوں پیو پٹریشن تے آئے تے گڈی وچ بہہ گئے۔ گڈی چل پئی تے زاہد نے گل چھیڑی: ”ابا جی! داتا صاحب کون سن تے کتھوں آئے سن؟ مینوں اوہناں دے بارے کجھ گلاں دسو۔“

زاہد دے ابا جی نے دسیا کہ داتا ہوراں دا پورا ناں شیخ سید ابوالحسن علی ہجویری رحمۃ اللہ علیہ اے۔ آپ 400 ہجری وچ شہر غزنی دے اک محلے ہجویر وچ پیدا ہوئے۔ آپ دے والد دانا سید عثمان جلابی اے۔ جلاب غزنی دا اک محلہ اے جتھے سید عثمان ہوری رہندے سن۔ آپ حضرت امام حسین رضی اللہ تعالیٰ عنہ دی اولاد وچوں نیں۔ سید عثمان ہوراں نے اپنے پتر نوں بڑے وڈے وڈے عالماں کولوں تعلیم دلائی۔ سید علی ہجویری رحمۃ اللہ علیہ ہوراں نے جوان ہو کے اپنی حیاتی دا بوہتا حصہ علم تے عرفان حاصل کرن وچ گزاریا۔ ایہدے لئی اوہناں شام، عراق، فارس، خراسان، ترکستان تے ہور نکالاں دے بڑے محلے تے اوکھے پینڈے کیتے۔ کئی صوفیاں تے بزرگاں نوں ملے تے اوہناں کولوں علم دی دولت اکٹھی کیتی۔

اک دن آپ دے مرشد ہوراں آپ نوں لاہور جان دا حکم دتا تے آکھیا کہ تسیں لاہور شہر جا کے لوکاں نوں حق سچ دی راہ دکھاؤ۔ ایہناں توں پہلاں لاہور وچ اوہناں دے پیر بھائی حضرت حسین زنجانی رحمۃ اللہ علیہ ایہہ خدمت کر رہے سن۔ ایس لئی آپ نے مرشد نوں آکھیا سرکار او تھے تے اگے ای اوہناں دے پیر بھائی حسین زنجانی رحمۃ اللہ علیہ ہوری کم کر رہے نیں۔ پر آپ دے مرشد ہوراں آکھیا، ”نہیں تسیں ضرور او تھے جاؤ“۔ آپ مرشد دے حکم موجب ٹر پئے۔ جس رات آپ لاہور داخل ہوئے، اوہدی سویر نوں لوکی حسین زنجانی رحمۃ اللہ علیہ دا جنازہ لے کے باہر نکل رہے سن۔ آپ نے اپنے پیر بھائی دا جنازہ پڑھیا تے اوہناں والا کم سنبھال لیا۔ نیکی تے سچائی دے چانن دی خاطر آپ نے دو بے شہراں دے سفروں کیتے، پر اپنی تبلیغ دا مرکز شہر لاہور نوں ای بنایا۔ اوہناں نے لوکاں دے دل روشن کیتے۔ آپ دی صحبت وچ آکے کئی لوک مسلمان ہوئے۔ آپ نے جہالت دا ہنیرا ڈور کیتا تے صدق صفائوں عام کر دتا۔ علم تے فضل دے خزانیاں دا مونہہ کھول دتا تے انج لوکاں وچ داتا گنج بخش دے ناں نال مشہور ہوئے۔

اخیر ایسے شہر وچ ای ہدایت دی راہ دکھاندے ہوئے 465ھ وچ اپنے رب نوں پیارے ہو گئے۔ آج ایہناں دا مزار ”داتا دربار“ دے ناں نال مشہور اے، جیہنوں پہلاں بابر بادشاہ فیرواں نے بنوایا تے کجھ حصہ اکبر بادشاہ نے وی تعمیر کرایا۔ ہن کئی ورہے پہلاں دربار لئی سونے دا بوہا پیرا نوں بن کے آیا اے۔ جیہڑا لوکاں دی دلچسپی دا مرکز اے۔

بوہت سارے صوفیاں تے ولیاں نے آپ دے درتوں فیض حاصل کیتا۔ حضرت خواجہ معین الدین چشتی اجمیری رحمۃ اللہ علیہ نے آپ دے مزار تے چلہ وی کٹیا سی۔ داتا صاحب رحمۃ اللہ علیہ نے بوہت ساریاں کتاباں لکھیاں، پرکشف المحجوب نوں سبھ توں ودھ شہرت حاصل ہوئی۔ ایس کتاب وچ حکمت، تصوف تے شریعت دیاں گلاں درج نیں۔

آپ ہوراں فرمایا:

”صوفی اوہ اے جیہڑا چنگی گل مونہوں آکھ کے اوہدے تے عمل وی کر کے دکھاوے۔ نفس نوں بھٹی خواہش توں دور رکھنا حقیقت دے بوہے دی چابی اے۔ اپنے توں وڈیاں دی صحبت وچ بیٹھو گے تے اوہناں کولوں کجھ سکھو گے۔ اتے جے اپنے توں چھوٹیاں دی صحبت وچ رہو گے تے اوہ تہا تھوں کجھ حاصل کرن گے۔

انسان نوں چاہیدا اے کہ وڈیاں نوں باپ برابر سمجھے تے اوہناں دی عزت کرے۔ ہانیاں نوں بھرانواں وانگوں جانے تے اوہناں نال نیکی کرے۔ چھوٹیاں نوں پُتر اں دی تھان تے رکھے تے اوہناں نال پیار تے محبت کرے۔“

ایسے چروچ گڈی لاہور اپڑ گئی، دونویں پہو پُتر عرس تے پہنچ گئے۔ زاہد نے ایڈوں پہلاں ایڈا وڈا کھ کدے نہیں سی ڈٹھا۔ ہر پاسے رونقاں ای رونقاں سن، پھٹلاں دے چھابے بھرے ہوئے سن۔ مزار دے اندر عجب سماں سی۔ کوئی دعاواں منگ رہیا سی۔ کوئی ورد و وظیفے وچ رجھیا ہو یا دسدا سی تے کوئی داتا صاحب رحمۃ اللہ علیہ دے روضے دی چالی نال لگا زارو زارو رہیا سی۔ فضا حق اللہ، سبحان اللہ تے اللہ اکبر دیاں واجاں نال گونج رہی سی۔ رات دا نظارہ ہو روی ویکھن والا سی۔ قوالی دی محفل جمی ہوئی سی۔ قوالی سنن والے سبحان اللہ، ماشا اللہ واہ وادے نال نال نذرانے دے طور تے روپے وی دے رہے سن۔ دوروں نیٹریوں داتا صاحب رحمۃ اللہ علیہ دے لکھاں عقیدت مند آ جا رہے سن۔ داتا صاحب رحمۃ اللہ علیہ دے دربار دی رونق اوہناں دی عظمت تے وڈیائی اثبوت پیش کر رہی سی۔

اوکھے لفظاں دے معنے

لفظ	معنے	لفظ	معنے	لفظ	معنے
رٹاپانا	ضد کرنا	غزنی	ملک افغانستان دا اک مشہور شہر	حیاتی	زندگی

مشق

- 1- داتا گنج بخش رحمۃ اللہ علیہ ہوراں دا اصلی تے پورا ناں کیہ اے؟
- 2- آپ نوں ہجویری کیوں آکھدے نیں؟
- 3- آپ نوں داتا گنج بخش رحمۃ اللہ علیہ کیوں کہندے نیں؟
- 4- تھلے دتے ہوئے لفظاں تے محاوریاں دے فقرے بناؤ۔
- 5- واہنڈے، گل ہلانا، پنڈ، اوکھے پنڈے، ڈیرا لانا، رٹاپانا، راہ دکھانا، پیر بھائی

بچیاں دا اقبال رحمۃ اللہ علیہ



علامہ اقبال رحمۃ اللہ علیہ دی شاعری، اسلامی دنیا واسطے اک خاص پیغام دی شاعری اے۔ علامہ صاحب نے اپنی شاعری وچ اتفاق، اتحاد، ہمدردی، پیار، وفا، ہمت، محنت تے اکھدا پیغام دتا۔ علامہ اقبال رحمۃ اللہ علیہ نے جتھے مسلمان قوم دے نوجواناں لئی خاص طور تے شاعری کیتی اے، او تھے اوہناں نے بالاں لئی بوہت ساریاں نظماں اردو وچ لکھیاں۔ ایہہ نظماں کہانیاں دے رنگ وچ سوہنا سبق دیندیاں نیں۔

1- ”اک مکڑا تے مکھی“

دی کہانی وچ اک مکڑے نے کسے مکھی نوں آکھیا کہ توں ہر روز میری گلی کولوں غیراں وانگر لنگھ جانی ایں، کسے دن آکے میرے گھر دی تقدیر جگا۔ مکھی نے جواب دتا کہ میں ایڈی جھلی نہیں۔ جیہڑا تیرے گھر دی پوہڑی چڑھیا فیر اوہنوں کسے نے مڑدا نہیں ویکھیا۔“ مکڑے نے آکھیا کہ توں تے ایویں جھل پنا پئی کرنی ایں میرا مطلب تے تیری خاطر خدمت کرنا ایں۔ میرے گھر وچ بڑیاں سوہنیاں ون سوہنیاں شیواں نیں، کسے دن آکے ویکھ تے سہی۔ مکھی نے جواب دتا۔ ”نہ بابا! میں نہیں نرم بستریاں تے آرام کردی۔ ایہناں اُتے سوں کے فیر کوئی اُٹھ نہیں سکدا۔“ مکڑے نے سوچیا کہ مکھی اوہدے جال وچ انج نہیں پھس سکدی تے ہن خوشامد نال کم کڈھنا چاہیدا اے۔ ایہہ سوچ کے مکڑے نے مکھی دیاں تعریفاں دے پل بندھ دتے۔ اوہدی پوشاک اٹھاں، حسن تے خوبیاں دا ذکر کرنا شروع کر دتا۔ مکھی اپنی خوشامد تے تعریف سن کے اوہدے جال وچ آ پھسی تے اوہدا شکار بن گئی۔ ایس نظم وچوں ایہہ سبق ملدا اے کہ خوشامد تے جھوٹی تعریف نوں پسند کرن والے دھوکے وچ آکے اپنا نقصان کر لیندے نیں۔

2- ”پھاڑ تے گا لھڑ“

دی کہانی وچ کسے پھاڑ نے اپنے وڈپنے اُتے غرور کردیاں ہویاں اک گالھڑ نوں مہنا ماریا کہ توں نکمی تے لگونی جیہی چیز ایں تے ایوں آکڑ آکڑ کے پھرنی ایں تینوں اپنی عقل تے مت اُتے شرم آونی چاہیدی اے۔ بھلا میری شان دے ساہنے تیری کیہ ہستی اے؟ میرے آگے تے دھرتی وی نیویں نیویں لگدی اے۔ گالھڑ نے جواب دتا کہ تیریاں ایہہ ساریاں کچیاں گلاں نیں جے کر میں بہت وڈی چیز نہیں تے توں وی تے میری طراں چھوٹا نہیں بن سکدا۔ ایہہ وڈ چھوٹ تے رب دی قدرت اے۔ میں تے درخت طراں چھوٹا نہیں بن سکدا۔ پر توں تے اپنی تھاں توں ملن جوگا وی نہیں۔ ایس کہانی وچوں ایہہ سبق ملدا اے کہ رب

دی دنیا وچ ہر چیز اپنی اپنی تھیں تے چنگی اے تے کسے نوں اپنی وڈیائی اُتے غور نہیں کرنا چاہیدا۔

3- ”گاں تے بکری“

دی کہانی وچ اک بکری کسے گاں دا حال چال پچھدی اے تے گاں اگوں اپنیاں مصیبتاں دارونارون لگ پیندی اے ”کہ ایہہ انسان بڑا کمینہ اے۔ دُدھ گھٹ ہووے تے ٹر ٹر کردا اے۔ کمزور ہو جاواں تے وچ سٹدا اے۔ میں ایہدے پچیاں نوں دُدھ پیایا کے پالنی آں تے ایہہ نیکی دا بدلہ برائی وچ دیندا اے۔“ بکری نے آکھیا کہ ایہہ گھاہ بھریاں تھانواں، ٹھنڈیاں ہوواں، چھاں والے گھرتے ہو رہو لتاں سبھ آدمی دے دم نال ای نیں۔ بے جنگل وچ ای رہنا پیندا تے پتا چلدا کہ آدمی نے کئے آرام بخشے نیں۔ گاں نے بکری دی گل نوں پرکھیا تاں سمجھ آئی کہ بغیر سوچے سمجھے کسے دا گلہ کرناوی کوئی چنگی گل نہیں۔

4- ”بچے دی دعا“

ایہہ وے کہ رہا میری زندگی نوں شمع وانگر بناوین تاں جے اوہدے چان نال دنیا دا ہنیرا مٹکے۔ میرے چمکن نال تھیں تھیں چان ہووے تے میں اپنے وطن نوں انج سجاواں جویں پھل باغ نوں سجاؤندے نیں۔ رہا میری زندگی بھنبٹ ورگی ہووے۔ مینوں علم دے چان نال محبت ہووے۔ میں غریباں دا حامی بناں، کمزور تے دکھی لوکاں نال محبت کرناں سکھاں۔ میرے اللہ! مینوں برائی کولوں بچا، تے نیک راہواں اُتے ٹرن دی توفیق دے۔

5- ”ہمدردی“

اک ٹہنے تے بلبل دی کہانی اے۔ اک ہنیری رات وچ بلبل راہ بھل کے اک درخت دی شاخ اُتے اداس تے پریشان بیٹھی ڈر رہی ہوندی اے کہ اوہ گھر کیوں اپڑ سکے گی۔ ایہہ گل سن کے اک ٹہنا اوہنوں دلاسا دیندا اے کہ فکر کرن دی کوئی گل نہیں اوہ چمک چمک کے راہ دکھاوے گا۔ کیوں جے دنیا اُتے اوہ لوگ ای چنگے اکھوان دے حقدار نیں، جیہڑے دو جیاں دے کم آؤندے نیں۔

6- ”پرندے دی فریاد“

وچ اک پرندہ جیہڑا اپنے وطن توں دُور کسے قید وچ پھسیا ہویا اے، رب اگے اپنے دیس توں دُوری تے دکھ بارے فریاد کر رہیا اے۔ اوہنوں گزرے ہوئے زمانے تے آزادی دے مزے یاد آ کے ستاندے نیں تے اوہ رب اگے فریاد دی اے کہ اوہ وی آزاد ہووے تے وطن دیاں بہاراں دیاں موجاں مانے۔

علامہ اقبال رحمۃ اللہ علیہ دیاں بالال لکھیاں ہویاں ایہہ نظماں دسدیاں نیں کہ علامہ صاحب رحمۃ اللہ علیہ نوں بالال نال بوہت پیارتے محبت سی۔ اوہ چاہندے سن کہ ساڈی قوم دے بال وی ترقی کر دیاں دو جیاں تو ماں دے بالال وانگر چنگے شہری بن کے

اپنی قوم تے ملک داناں اُچا کرن، اخلاق، ہمدردی، نیکی تے اک دُوجے دے کم آؤن دا جذبہ پیدا کرن۔ نالے غرورتے خوشامد کولوں بچ کے رہن۔

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
انکھ	غیرت	اولھے	چکھے، پرے	ویروا	نکھیڑا، تشریح	مہنا مارنا	طعنہ دینا
پرکھیا	جاچیا، سوچیا، سمجھیا	ٹہننا	جگنو	وڈپنا	وڈیائی، وڈا ہونا	نگوئی	معمولی
بھنبٹ	پروانہ، پنگا						

مشق

- 1- علامہ اقبال رحمۃ اللہ علیہ دیاں بالاں لئی لکھیاں ہویاں نظماں دے ناں دسو؟
- 2- نظم ”مکڑا تے مکھی“ وچ کیہ سبق ملدا اے؟
- 3- نظم ”پھاڑتے گالھڑ“ وچ غورنوں بُرا دسیا اے۔ بیان کرو کہ شاعر غورنوں کیوں بُرا سمجھدا اے؟
- 4- نظم ”ہمدردی“ سانوں کیہ کم کرن دی جاچ سکھاؤندی اے؟

بے زبان

اکبر نے وچھی نوں ایڈے زور داسوٹا ماریا کہ اوہ لنگان لگ پئی۔ پیو دیکھد اسی اوس آکھیا ”بھیڑیا کیوں مارا یا ایسی بے زبان نوں؟“

اکبر آکھیا: ”اباجی! ایہہ میری کاپی پئی کھاندى سی۔“

پیو نے آکھیا: ”توں اپنے کاغذ ایس طراں کھلے چھڈ کے اٹھنا ایں۔ بے گاں چھڑگئی سی تے وچھی نوں توں تھان سر بھدوں۔ ایہدے اگے پٹھیاں دی مٹھ پاندوں۔ ایناں ظلم چنگا نہیں ہوندا۔“

اکبر آکھن لگا: ”ایہہ تے اُنج وی مینوں چنگی نہیں لگدی۔“

پیو آکھیا: ”نہ پتر ایہہ گل ٹھیک نہیں۔ مال ڈنگردی سنبھال کر دی اے۔ اوہناں نوں وی پیار کر دی اے۔ ایہہ ساڈے کم آؤندے نہیں۔ ایس ایہناں دا دُھ پینے آں، سواری کرنے آں، ایہناں نال واہی کرنے آں، گوشت کھانے آں، ٹانگے ریڑھے اگے جو لینے آں۔ ایہہ نہ ہون تے ساڈے کم کھلو جان۔ ایہناں دی پالنا کر دی اے۔ ساڈے نبی کریم صلی اللہ علیہ وآلہ وسلم دے ویلے تے اودوں پہلاں دے بے مہرے تے ظلمی لوک ایہتوں تیکر وی کر دے سن پئی کھلیاں کھلو تیاں ڈنگراں دا گوشت وڈھ لیندے سن۔ اوہناں نوں جیوندی جان دا دھیان نہیں سی آؤندا۔ آپ صلی اللہ علیہ وآلہ وسلم نے ایس بھیڑے کم توں لوکاں نوں منع کیتا تے ایہہ برائی کئی۔ آپ صلی اللہ علیہ وآلہ وسلم نے ایناں ای نہیں کیتا۔ ایہہ وی مت دتی پئی چڑیاں جانوراں نوں نہیں ستائی دا۔ ساڈے نبی کریم صلی اللہ علیہ وآلہ وسلم تے چڑیاں جانوراں داوی بڑا دھیان رکھدے سن۔ پتر! ذرا دھیان نال سُن: اک واری آپ صلی اللہ علیہ وآلہ وسلم دے کول اک بندہ آیا جیسے اپنی چادر وچ کُجھ لکایا ہویا سی۔ آپ صلی اللہ علیہ وآلہ وسلم نے پچھیا: ”ایہہ کیہ اے؟“

آکھیا: ”حضور صلی اللہ علیہ وآلہ وسلم اک جانور دے بچے نیں، اک جھاڑی وچ بیٹھے سن۔ مینوں چنگے لگے میں چک لیا یاں۔“ آپ صلی اللہ علیہ وآلہ وسلم نے فرمایا ”توں چنگا نہیں کیتا۔ اوہ جانور پریشان ہون گے۔ ایہناں نوں او تھے ای رکھ آ جتھوں چکے نیں۔ چڑیاں جانوراں نوں دُکھ دینا چنگا نہیں ہوندا۔“ حضور صلی اللہ علیہ وآلہ وسلم دی گل سُن کے اوہ بندہ اوہناں پچیاں نوں او سے تھان تے رکھ آیا۔

آپ صلی اللہ علیہ وآلہ وسلم دے ایس خلق تے رحم دا ایہہ اثر سی پئی اک جرنیل عمرو بن العاص رضی اللہ تعالیٰ عنہ اک لڑائی تے گئے اک تھان چوکھا چرڈیر رکھنا پیا۔ اوتھوں کوچ کرن لگیاں اوہناں دیکھیا اک تنبو وچ کبوتری آہلنا پایا ہویا اے تے بچے کڈھے ہوئے نیں۔ سپاہی اوہ تنبو پٹن لگے تے اوہناں روک دتا تے آکھیا، ایہہ مینوں پریشان نہ کرو، ایہہ تنبو اتھے ای لگا رہن دیو، مسلماناں دی فوج اوہ تنبو اتھے ای چھڈ کے کوچ کر گئی۔

عمرو رضی اللہ تعالیٰ عنہ بن العاص دی کرنی تے او تھے اک شہر و سیا جیہدا ناں ”فسطاط“ رکھیا گیا۔ فسطاط دا مطلب اے تنبو۔

آج وی دنیا ایس گل نوں سمجھدی اے پئی ڈنگرتے پشوساڈے بے زبان ساتھی نیں۔ چڑیاں تے جانور ساڈی وسوں دا سوہنا رنگ نیں۔ ایہہ نہ ہون تے ساڈیاں ساریاں رونقناں مک جان۔ مڑ چڑیاں تے جانور اچھے کھپڑے وی کھاندے نیں جیہڑے ساڈیاں فصلاں نوں اجاڑ دے نیں۔

ایسے لئی تھیں تھیں مال ڈنگراں دی پالنا تے جانوراں دی رکھی لئی قاعدے قانون بنے ہوئے نیں تے ڈنگراں توں اوہناں دی ہمت توں ودھ کم لین دی منا ہی اے۔ بے رحمی نوں روکن لئی محکمے بنے ہوئے نیں جیہڑے دھیان رکھدے نیں جے زخمی تے بیمار ڈنگراں توں کم نہ لیا جاوے تے ٹانگیاں وچ اینیاں سواریاں نہ بٹھائیاں جان، جیہناں نوں کچھن لئی گھوڑیاں نوں اوکھت ہووے۔ جیہڑے جانور حلال نہیں اوہناں نوں ایویں مارن دی منا ہی اے۔

جس طراں سانوں ڈھپ دی لوڑ ہوندی اے، بھکھ تریہہ لگدی اے، دکھ درد ہوندا اے، او سے طراں ڈنگراں جانوراں نوں وی ہوندا اے۔ ایس لئی ایہناں واسطے ڈھپ چھاں، ایہناں دی بھکھ تریہہ تے ایہناں دے ڈکھ سکھ دا دھیان رکھنا ساڈا کم اے۔ کیوں جے ایہہ بے زبان نیں۔ ہوئی بیٹی دس نہیں سکدے۔“

اکبر نے ایہہ سُنیا تے آکھیا۔ ”اباجی! مینوں بڑا افسوس اے، میتھوں بڑا ماڑا کم ہو یا اے۔ اٹوں میں دھیان رکھاں گا، تے کدی کسے جانور نوں دکھ نہیں دیاں گا۔“

اوکھے لفظاں دے معنے

لفظ	معنے	لفظ	معنے	لفظ	معنے
وچھی	بچھڑی	چٹھے	چارا	کوچ کرنا	چلے جانا
تنبو	خیمہ	اوکھت	مشکل، تکلیف	مناہی	منع کرنا، روکنا

مشق

1. رسول کریم صلی اللہ علیہ وآلہ وسلم دا جانوراں بارے ہمدردی دا واقعہ لکھو؟
2. فسطاط شہر کس طراں آباد ہو یا؟
3. جانوراں تے مال ڈنگراں دی پرورش کیوں ضروری اے؟

اتفاق

بیتیاں ویلیاں دی گل اے۔ اک پنڈ وچ اک بزرگ آدمی رہندا سی، جیہدا ناں افضل سی۔ پنڈ دے سارے نکلے وڈے اوہدی عزت کردے سن۔ اوہ کھاندے پیندے گھر داسی تے دو جیاں دی ہراو کھے ویلے مدد کرداسی۔ پنڈ وچ جے کوئی بندہ یا سوانی بیمار ہوندی، افضل اوہدے دوا داڑو دا بندوبست کردا۔ شہر اوہدے پنڈوں دُورسی۔ جے کسے بیمار نوں ڈاکٹر کول لے جانا ہوندا، اوہ اپنی گھوڑی اُتے بٹھا کے شہر لے جاندا تے اوہدی پوری طراں خدمت کردا۔ جے کسے نوں پیلے بتاوا، ہن لئی ڈھکے وچھے دی لوڑ پیندی تے اوہ بغیر کسے نانہہ توں اوہدی مدد کردا۔ پنڈ وچ کسے ماڑے بندے دی دھی بھین دے ویاہ دامستلہ ہونداتے اوہ چنچ کے اوہدی مدد کردا۔ ویاہ دے سارے کم آپ نیڑداتے اوناں چر گھر نہ جاندا، جتاں چر ڈولی گھروں تہ نہ جاندی۔ پنڈ وچ کوئی جھگڑا جھیڑا ہوندا تے سارے لوک افضل کول جاندا تے اوہدا فیصلہ ہر بندے نوں منظور ہوندا۔ افضل وی اپنا فیصلہ بڑی سوچ نال سناؤندا تاں جے کسے نوں وی کوئی اعتراض نہ ہووے۔

افضل پنڈ دے ہر بندے نال کھڑے متھے ملداتے ہر بندہ ایہہ ای سمجھدا کہ اوہ بڑا سٹکھی اے، پر اصل پچھوتے اوہ ڈاڈا دکھی سی۔ اوہدی وجہ ایہہ سی کہ اوہنوں اللہ تعالیٰ نے ست (7) پتر دتے ہوئے سن، پر اوہ ستے ای اک دو جے نال لڑدے جھگڑدے رہندے سن۔ اک دی صلاح دو جے نال نہیں سی رلدی۔ اوہ ہمیش اک دوجے دے خلاف سازشاں کردے رہندے تے کسے نہ کسے بہانے لٹن جھگڑن لئی تیار رہندے۔ پتر اں دی ایس روز روز دی لڑائی نے اوہنوں ویلے توں پہلاں بڈھیاں کردتاسی۔ ہولی ہولی اوہدی صحت خراب ہون لگ پئی۔ ہن اوہ گھروں باہر وی گھٹ ای نکلداسی۔ پنڈ دے لوک کماں کاراں لئی اوہدے کول آؤندے۔ اوہ اوہناں دی خدمت کردا، پر ہن اوہ پہلے والا جذبہ منک گیا سی۔ پنڈ دے لوک اوہدے پتر اں کولوں وی اوہدے ورگی مدد لوڑدے سن، پر افضل وچ تے افضل دیاں پتر اں وچ زمین آسمان دا فرق سی۔ اوہ اکثر لوکاں نوں ٹرکا دیندے۔ ایہناں ساریاں گلاں دا افضل نوں بڑا دکھ ہوندا۔ اوہ اندر اندر ای سڑدا بھجدا رہندا، پر اپنے پتر اں اگے اوہدی واہ نہ چلدی۔

ویلا لنگھدا گیا۔ افضل دنوں دن زیادہ بیمار ہوندا گیا۔ جدوں اوہدا انیرلا ویلا آیا تے اوہنے اپنے پتر اں نوں بلایا تے اوہناں نوں آکھیا کہ تسیں نہر دے کٹدھے جاؤ تے اوہناں اک اک سوٹی توڑ لیاؤ۔ ستے پتر دوڑے دوڑے گئے تے اک اک سوٹی توڑ لیا۔ افضل نے ساریاں سوٹیاں اوہناں کولوں لے کے اوہناں دا اک گٹھا بنایا۔ ساریاں پتر اں نوں کول بٹھالیا۔ سبھ توں پہلاں اوہنے اپنے وڈے پتر نوں اوہ گٹھا دیتا تے کہیا کہ ایہنوں توڑ۔ وڈے پتر نے بڑا زور لیا پر اوہ گٹھا نہ ٹٹا۔ فیروہنے اوہ ای گٹھا وڈے توں چھوٹے پتر نوں دیتا تے اوہنوں وی آکھیا کہ اوہ ایس گٹھے نوں توڑے چھوٹے پتر کولوں وی اوہ گٹھا نہ ٹٹیا۔

ہولی ہولی افضل نے ساریاں پتر اں نوں گٹھا توڑن لئی آکھیا، پر کسے کولوں وی اوہ نہ ٹٹ سکیا۔ فیروہنے گٹھا کھول

دیتا تے اک اک سوٹی ساریاں پُٹراں نوں پھڑائی تے اوہناں نوں کہیا کہ ایہہ سوٹی توڑو۔ ساریاں ای اپنی اپنی سوٹی جھٹ پٹ توڑئی۔

افضل دے پُٹراں نوں کوئی پتا نہیں سی کہ اوہناں دا پیو ایس گل دا کیہ سٹا کڈھنا چاہندا اے۔ جدوں ساریاں اپنی اپنی سوٹی توڑئی تے اوہنے ساریاں پُٹراں نوں دسیا۔ ”میرے بچو! تہانوں رل مل کے اتفاق سلوک نال رہنا چاہیدا اے۔ جے تسیں رل کے رہو گے تے تہانوں کوئی غیر نقصان نہیں پہنچا سکدا۔ جویں کہ ستاں سوٹیاں دا گٹھا تہاڈے کولوں نہیں ٹٹیا تے جے تسیں وکھو دکھ ہو جاؤ گے، اک دو جے نال لڑو گے تے فیر تہانوں ہر بندہ نقصان پہنچا سکدا اے۔ جویں تساں ساریاں اک اک سوٹی توڑئی۔“

افضل دیاں پُٹراں جدوں پیو دی ایہہ گل سنی تے اوہ ڈاڈھے شرمندہ ہوئے تے اگے توں اکٹھیاں رہن دی قسم کھادی۔

اوکھے لفظاں دے معنے

لفظ	معنے	لفظ	معنے	لفظ	معنے
سوئی	عورت، زنانی	پیلی، بتا	زمین، کھیت	پوری تیاری نال	پُچ کے
نانہہ	انکار	کھڑے متھے	خوش ہو کے	نتیجہ	سٹا

مشق

- 1- افضل پنڈوچ لوکاں نال کیہ سلوک کردا سی؟
- 2- پنڈوچ لوک افضل کولوں کیوں خوش سن؟
- 3- افضل تے اوہدے پُٹراں دی کہانی اپنے لفظاں وچ لکھو؟
- 4- تھلے دتے ہوئے لفظاں دے معنے دسو تے ایہناں نوں فقریاں وچ ورتو۔
ڈنگر، جھگڑا، جھیڑا، سٹکھی، گٹھا، سڑدا بھجدا
- 5- ایس کہانی توں تہانوں کیہ سبق ملدا اے؟

بابا فرید گنج شکر رحمۃ اللہ علیہ

پاکپتن، صوبہ پنجاب داک مشہور شہر اے، جتھے حضرت بابا فرید الدین گنج شکر رحمۃ اللہ علیہ دے مزار مبارک تے محرم وچ اک وڈا عرس ہوندا اے۔ پاکستان دے پنڈاں تے شہراں وچوں ہزاراں دی تعداد وچ لوکی ایس عرس تے آؤندے نیں تے روحانی فیض نال اپنیاں خالی جھولیاں بھر کے لے جانداے نیں۔

بابا جی ساڈے اوہناں نیک تے پاک بزرگاں وچوں اک اجیہی ہستی نیں، جیہناں لوکاں نوں رب دی سچی راہ دکھاوے لئی اپنی ساری حیاتی گزار چھڈی۔ بابا جی دا اصلی ناں مسعود تے لقب فرید الدین اے۔ پراوہ گنج شکر دے ناں نال مشہور نیں۔ اوہناں نوں گنج شکر کیوں آکھیا جاندا اے؟ ایس بارے بوہت ساریاں گلاں مشہور نیں۔ جیہناں وچوں اک ایہہ وی اے پئی بابا جی دے بچپن وچ اوہناں دی ماں اپنے پُتر نوں نماز پڑھن دی عادت پاؤن لئی جانماز تھلے شکر دی پڑی رکھ دیندی سی تے آکھدی سی پئی اللہ تعالیٰ نماز پڑھن والیاں نوں شکر دیندا اے۔ اک دیہاڑے جدوں مائی صاحبہ گھر وچ نہیں سن، جانماز تھلے شکر دی پڑی نہ رکھی جاسکی، پر بابا جی نے اپنی عادت موجب نماز پڑھی تے جانماز دے تھلیوں شکر دی پڑی لے کے کھا چھڈی۔ کجھ چر بعد جدوں مائی صاحبہ گھر آئے، اوہناں نے پچھیا ”فرید توں نماز پڑھی اے؟“ بابا جی جواب وچ آکھیا ”ہاں نماز وی پڑھی اے تے شکر وی کھائی اے۔“ اماں جی پہلوں تے حیران ہوئے فیر سمجھ گئے پئی شکر اللہ تعالیٰ نے اپنی رحمت نال بھیج چھڈی اے۔ ایس دن توں بعد اماں جی اپنے پُتر نوں گنج شکر یعنی شکر دا خزانہ آکھن لگ پیاں۔

بابا جی 1188ء وچ ملتان دے نیڑے اک پنڈھکو تو وال وچ پیدا ہوئے۔ والد دانا شیخ جمال الدین سلیمان سی تے ماں دانا قمر سم بی بی سی۔ بابا جی اُجے نکلے ای سن جدوں باپ ایس دنیا توں چلے گئے۔ ایس لئی مڈھلی تعلیم مائی ہوراں کولوں حاصل کیتی۔ ایہناں اپنے پُتر نوں کجھ ایس طریقے نال پڑھایا کہ اوہناں دے دل وچ کئی عمرے ای خدادے رسول صلی اللہ علیہ وآلہ وسلم دی محبت اشکاں مارن لگ پئی تے اوہناں دی شرافت تے پرہیزگاری، نیکی تے علم دا ذکر تھیں تھیں تے ہون لگ پیا۔

بابا فرید رحمۃ اللہ علیہ جدوں اٹھاراں سال لاں دے ہوئے تے مائی صاحبہ نے اوہناں نوں ہور علم حاصل کرن لئی ملتان بھیج دتا۔ اوہ تھے اوہناں قرآن مجید حفظ کیتا۔ ملتان وچ اوہناں دی ملاقات اوس ویلے دے بوہت وڈے بزرگ خواجہ قطب الدین بختیار کاکی رحمۃ اللہ علیہ نال ہوئی۔ ایہناں بابا جی نوں اپنے مریداں وچ شامل کر لیا تے اپنے نال دئی لے گئے۔ کجھ چر دئی رہن توں بعد خواجہ قطب الدین بختیار کاکی رحمۃ اللہ علیہ نے بابا جی نوں اجدوہن جا کے اسلام دی تبلیغ کرن دا حکم دتا۔ بابا جی ساری عمر دین دی تبلیغ کردے رہے۔ اخیر 1280ء وچ ایس دنیا توں ٹر گئے۔

بابا جی اک اُچے شاعر وی سن۔ سکھ مذہب دی مقدس کتاب گرنٹھ وچ اوہناں دے اکثر شعر موجود نیں۔

انج تے بابا جی دے کارنامیاں نوں یاد رکھن لئی عرس دی تیاری عید الاضحیٰ توں ای شروع کردتی جاندی اے، پر محرم دی پہلی تاریخ نوں پاکستان شریف وچ لوکاں داک وڈا اکٹھ ہوندا اے۔ لوکی مزار شریف کول بیٹھ کے دن رات قرآن پاک دی تلاوت

تے اللہ دی عبادت وچ زُجھے رہندے نیں۔ مزار دے نال ای بوہت وڈی مسجد اے، جس وچ ہر نماز توں بعد درود شریف دا ورد ہوندا اے۔ علمائے کرام بابا جی دی حیاتی تے تعلیمات بارے تقریراں کردے نیں تے شاعر اپنی شاعری دے راہیں بابا جی دا ذکر کردے نیں۔

مزار دے کول ای قوالاں دیاں جوڑیاں کافیاں تے نعتاں پڑھدیاں رہندیاں نیں تے لوکی سُن دے تے اپنے دل وچ اللہ دی یاد تازہ کردے نیں۔

ایس عرس دی اک خاص گل ایہہ وی اے پئی بابا جی دے مزار دا اک بوہا اے جس نوں بعض روایتاں مطابق بابا جی نے بہشتی دروازہ آکھیا سی۔ ایہدے وچوں لنگھن لئی لوک قطار وچ کھلو جان دے نیں تے ایہہ قطار شہروں باہر تیکر چلی جاندی اے۔ پہلی محرم توں لے کے دس محرم تک عرس دی گہما گہمی رہندی اے۔ پاکستان دے مقامی لوکاں توں وکھ دو جے مُلکاں وچوں وی بابا فرید گنج شکر رحمۃ اللہ علیہ دے عقیدت مند عرس دے موقعے تے آپ دے مزار اُتے حاضری دیندے نیں۔ تاریخ گواہ اے کہ آپ دی تبلیغ توں متاثر ہو کے ہزاراں ہندوآں نے اسلام قبول کیتا۔

آپ دا کلام صبر تے توکل دا نمونہ اے وگی ویکھو:

جے توں عقل لطیف کالے لکھ نہ لیکھ
اپنے گریوان میں سر نیواں کر ویکھ
روٹی میری کاٹھ دی لاؤن میری بھکھ
جنہاں کھاہدی چوپڑی گھنے سہن گے دکھ

اوکھے لفظاں دے معنے

لفظ	معنے	لفظ	معنے	لفظ	معنے
حیاتی	زندگی	نکے	چھوٹے	مڈھلی	ابتدائی، پہلی
جس پاروں	جس وجہ توں	اجودھن	پاکپتن دا پُرانا ناں	مقدس	پاک
لیکھ	مقدر	گریوان	گلمہ	کاٹھ	لکڑی

مشق

- 1- بابا فرید گنج شکر رحمۃ اللہ علیہ نوں گنج شکر کیوں آکھیا جاندا اے؟
- 2- بابا فرید گنج شکر رحمۃ اللہ علیہ دا عرس کتھے تے کدوں ہوندا اے؟
- 3- بابا صاحب دے مزار تے اک خاص بوہے داناں کیا اے؟

دُعا

تیرے درتے جیہڑے وی سردھر دے مولا
 کیوں نہ ورد کراں ہر ویلے تیرے نال دا
 علم دی دولت سبھ توں چنگی کہن سیانے
 بے علمی دی دُھپ وچ کدھرے سٹر نہ جاواں
 اپنے چندا ماموں کول میں اڈ کے پہنچاں
 دنیا آکھے محنت نال ای سبھ کجھ ملدا
 اوہناں کولوں مینوں ہر دم رکھ بچا کے
 تیرے کولوں جھوٹھ دے اُچے محل نہ منگاں
 اک دوجے توں نفرت کرنی سبھ بھل جائیے

توں اوہناں دے اُچے رُتے کر دے مولا
 تیرے نال تے دُبتے بیڑے تردے مولا
 ایہدے نال توں میری جھولی بھر دے مولا
 علم ہنر دی میرے تے چھاں کر دے مولا
 توں آج مینوں اڈن دے لئی پَر دے مولا
 مینوں وی محنت دا عادی کر دے مولا
 جیہڑے لوکی جھوٹھ دی حامی بھر دے مولا
 سچ دے نال چمکدا مینوں گھر دے مولا
 پیار دا جذبہ سینیاں وچ توں بھر دے مولا

نکیاں ہتھاں نال دعا واں ایہو منگاں

میریاں راہواں وچ وی چانن کر دے مولا

(منظور وزیر آبادی)

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
رُتے	راہواں	طرف دار	حامی	جوش ، ولولہ	جذبہ	شان	رُتے

مشق

1- تیرے شعروچ شاعر نے کیہ بن دی دعا منگی اے؟

2- اخیرے شعروچ کیہ تمنا کہتی گئی اے؟

نور منارے

مسلماناں دی تاریخ ول نظر ماریے تے سانوں بے حساب نور منارے لہن گے۔ ایہہ نور منارے اوہ مجاہد تے بہادر سپاہی سن، جیہڑے اپنے دین دی اُچھائی لئی میدان وچ اترے تے تاریخ وچ ہمیش ہمیش لئی اپنا ناں چھڈ گئے۔ ایتھے اسیں تہانوں ایہہ جیہاں کجھ ہستیاں بارے دسناں گے۔

خالد بن ولید رضی اللہ تعالیٰ عنہ

حضرت خالد بن ولید رضی اللہ تعالیٰ عنہ دا تعلق قبیلہ قریش نال سی۔ قریش جنگ کرن وچ مشہور سن۔ حضرت خالد بن ولید رضی اللہ تعالیٰ عنہ نے اپنے قبیلے تے عرباں دیاں روایتاں مطابق کئی عمرے ای تیر اندازی تے دوجیاں جنگی ہتھیاراں نوں ورتن دافن سکھ لیا سی۔

حضرت خالد بن ولید رضی اللہ تعالیٰ عنہ ہوراں مسلمان ہون توں مگروں اپنا سبھ کجھ اسلام لئی لٹا دیتا۔ مسلمان ہون توں بعد اوہ سبھ توں پہلاں موتہ دی جنگ وچ شامل ہوئے۔ ایس جنگ وچ مسلماناں دے تن سپہ سالار وارو واری شہید ہو گئے تے اوہناں نے کمان سنبھالی۔ اوس دن اوہناں دے ہتھوں نو (9) تلواراں ٹٹیاں تے فاتح دی حیثیت نال پچھانہہ پرتے۔ حضور صلی اللہ علیہ وآلہ وسلم نے اوہناں نوں ”سیف اللہ“ دا لقب عطا فرمایا، جیہدا مطلب اے ”اللہ دی تلوار“ ایس توں بعد آپ نے بوہت ساریاں جنگاں وچ حصہ لیا۔ حضرت ابو بکر صدیق رضی اللہ تعالیٰ عنہ دے دور وچ کافراں تے مرتداں نوں ختم کرن وچ وی آپ نے ودھ چڑھ کے حصہ لیا۔ حضرت عمر فاروق رضی اللہ تعالیٰ عنہ دے دور وچ آپ نے یرموک دی مشہور جنگ لڑی، جیہدے وچ بے شمار کافر مارے تے ایہہ جنگ جت لئی۔

حضرت خالد بن ولید رضی اللہ تعالیٰ عنہ کافراں دے خلاف لڑ رہے سن کہ حضرت عمر فاروق رضی اللہ تعالیٰ عنہ نے اوہناں نوں سپہ سالاری توں ہٹا دیتا۔ اوہناں دی وڈیائی ایتھوں ای لہدی اے کہ اوہناں کوئی حجت نہ کییتی تے اوس توں بعد اوہ عام سپاہی دی حیثیت نال لڑ دے رہے۔ اوہناں دے جسم دا کوئی حصہ اجیہا نہیں سی، جیہڑا زخماں توں بچیا ہووے۔ حضرت خالد بن ولید رضی اللہ تعالیٰ عنہ نوں شہید نہ ہون دا بڑا دکھ سی۔ آپ نے اکٹھ (61) درہیاں دی عمر وچ وفات پائی۔

محمد بن قاسم

ہندوستان دے راجا دہر دے بندیاں نے مسلمان تاجراں دے قافلے نوں لٹ لیا سی۔ قیدیاں وچ کجھ زنانیاں وی سن۔ حجاج بن یوسف نے محمد بن قاسم نوں اوہناں دی مدد لئی ہندوستان تے حملے دا حکم دیتا۔ اوس ویلے محمد بن قاسم دی عمر تقریباً ستاراں (17) ورہے سی۔ محمد بن قاسم نے نکلیاں ہوندیاں ای نیزہ بازی، تلوار بازی تے تیر اندازی وچ اپنا ناں پیدا کر لیا سی تے خلیفہ

ولید بن عبدالمالک دے بھرا سلیمان بن عبدالمالک نوں وی نیزہ بازی وچ ہرایا ہویا سی، جیہڑا اوس دور داسبھتوں وڈا نیزہ بازی۔
 دمشق توں اوہ پنج (5) ہزار مجاہد لے کے شیراز راہیں مکران اُپڑیا۔ لس بیلا دیاں پہاڑیاں وچ اوہنے راجہ داہرنوں پہلی بار دٹی۔ مسلماناں دے حوصلے ودھ گئے سن راجہ داہر داسپہ سالار سُ گیا۔ ایس توں مگروں محمد بن قاسم نے دیہل نوں فتح کیتا۔ اخیر تے راجہ داہرنوں برہمن آباد وچ شکست دٹی تے فیہ محمد بن قاسم نے ملتان دماحصرہ کر کے ایہہ شہروی فتح کر لیا۔
 محمد بن قاسم اک پکا مسلمان سی۔ اوہ ڈگے ہوئے دشمن تے تلوار چکنا اپنی ہتک سمجھدا سی۔ ایہہ وجہی کہ پنج ہزار مجاہد لے کے تُرن والا سپہ سالار ڈھائی لکھ مجاہداں داسپہ سالار بن گیا سی۔ محمد بن قاسم دے ہندوستان نوں فتح کرن دے سببوں مسلماناں نوں ہندوستان تے کئی صدیاں حکومت کرن داموقع ملیا۔

سلطان محمود غزنوی

محمود غزنوی نے ہندوستان تے ستاراں (17) حملے کیتے۔ ہندوستان دی حالت اوہوسی، جیہڑی محمد بن قاسم دے ویلے سی۔ وکھریاں وکھریاں حکومتاں تے وکھرے وکھرے راجے سن۔ محمود غزنوی نے اپنیاں جنگاں داندھ جے پال دی حکومت دے خاتمے توں بدھا۔ پنجاب دے حملیاں وچ لاہور دی فتح تے ملتان تے قبضہ وی شامل نیں۔

محمود غزنوی دا اخیر لاہور داسومناں تے سی۔ ایہہ ہندو آں دا گڑھ سی، تے سارا ہندوستان اوہدا مقابلہ کرن لئی استتھے اکٹھا ہو گیا سی، پر ایس مجاہد نے کسے کولوں ڈرنا نہیں سی سکھیا۔ اوہ صرف اللہ دی ذات کولوں ڈر داسی۔ سومناں دی فتح اوہدا سبھتوں وڈا کارنامہ اے۔ سومناں دے وڈے بت وچوں لکھاں روپے دے ہیرے نکلے۔ ہندو آں نے بڑا آکھیا کہ ایہہ بت نہ توڑو۔ ایہدے برابر تول کے سونا چاندی لے لوو۔ محمود غزنوی نے آکھیا کہ میں بت وچن والا نہیں اکھوانا چاہندا سگوں بت توڑن والا اکھوانا چاہناواں۔

محمود غزنوی بڑا بہادر تے سوجھوان بادشاہ تے جرنیل سی۔ ارادے دا پکا تے جنگی چالاں داماہر سی۔ محمود غزنوی دی ایس فتح نے محمد بن قاسم دی فتح نوں پکا کر دتا تے مسلماناں دی حکمرانی دادور شروع ہو گیا۔

چاند بی بی

چاند بی بی برصغیر دی اک نیک دل تے بہادر ملکہ سی۔ اوہدا شوہر بیجا پور دا حاکم سی، جیہدے مرن دے بعد اوہ تخت تے بیٹھی۔ اک دن چاند بی بی اپنی نونہ کول بیٹھی سی کہ اوہنوں پتا چلیا کہ اکبر بادشاہ دے پتر مراد نے احمد نگر تے حملہ کرن لئی کوچ کر دتا اے۔ ایہہ سن کے چاند بی بی نے آکھیا کہ میں احمد نگر جاواں گی۔ میں ملک لئی جان دے دیواں گی۔ احمد نگر اُپڑ کے اوس نے قلعے وچ فوج دی کمان سنبھال لئی۔ اوہنے شہزادے مراد نوں گل کرن داسنبھا گھلیا پر اوس نے انکار کر دتا، تے جنگ شروع ہو گئی۔ ایہہ جنگ 1594ء وچ دسمبر دے مہینے شروع ہوئی۔ چاند بی بی نے مرداں وانگوں دشمن دما مقابلہ کیتا تے اخیر مغلاں نوں ہرا دتا۔

شہزادے مراد نے چاند بی بی دی بہادری تے شرافت دالو ہاسن لیا۔

چاند بی بی دل دی بڑی نرم سی، پر جدوں اوہ کوئی ارادہ کر لیندی تے فیر دنیا دی کوئی طاقت اوہنوں اوس توں ہٹا نہیں سی سکدی۔ اوہ بڑی بے باک تے نڈرسی۔ اوہنے ہر میدان وچ ایہہ گل ثابت کر کے دی کہ مسلمان عورت مشکل تے مصیبت دے ویلے کدی وی حوصلہ نہیں ہاردی۔

اوکھے لفظاں دے معنے

لفظ	معنے	لفظ	معنے	لفظ	معنے
روایتاں	رسماں ، ریتاں	فاتح	جت جان والا	کاذب	جھوٹھا
مُرتد	اوہ مسلمان جیہڑے اپنے دین نوں چھڈ دین	گرٹھ	مرکز	کمان سنبھالی	انتظام سنبھالی

مشق

- 1- اسلام لیاؤن توں مگروں حضرت خالد بن ولید رضی اللہ تعالیٰ عنہ نے سبھ توں پہلاں جنگ کیہڑی لڑی سی؟
- 2- محمد بن قاسم جدوں سپہ سالار بنیا تے اوہدی عمر کئی سی؟
- 3- محمود غزنوی نے ہندوستان تے کنے حملے کیے؟
- 4- چاند بی بی کتھوں دی حکمران سی تے کیہدے نال جنگ کرن تے اوہدی بہادری دا چرچا ہو یا سی؟

ساڈا دیس

کیہڑے کیہڑے روپ گناواں وگدے پانی، ٹھنڈیاں چھاواں
 لس لس کردیاں کچیاں کلیاں خوشبوواں دے گھر وچ پلیاں
 اُتے اُتے رُکھ منارے جنھاں راہ دے روپ شنگھارے
 انکھاں والے گبھرو ہیرے چٹے چٹے سوہے چیرے
 میٹاں دے وچ لکے سونے کدھرے کنکاں کدھرے جھونے
 پولے پیریں ٹرن ہواواں لین ہلارے سوہل کپاواں
 ساڈا دیس گناں دا گھنا

اس دیاں خیراں منگداں رہنا

(رؤف شیخ)

اوکھے لفظاں دے معنے

لفظ	معنے	لفظ	معنے	لفظ	معنے
رُکھ	درخت	گبھرو	جوان	چیرے	صافے
چٹے	پگلاں، پگڑیاں	پولے پیریں	بے آواز، سبھے سبھے	گن	خوبیاں

مشق

- 1- اپنے دیس دیاں خوبیاں بیان کرو؟
- 2- شاعر نے اپنے دیس دی خیر منگن واسطے کیوں آکھیا اے؟
- 3- دیس دا اصل سونا کیہڑیاں چیزاں نیس؟

بول دا پالن

جوانی ویلے بابے رحمے دا اک پگ وٹ یار ہوندا سی، جیہداناں دیتا سی۔ اوہ دونوں فیض پور وچ رہندے سن۔ دونواں دا ایناں گوڑھا پیاری جے اک دو جے دے گھراں وچ کھلے ڈُلھے آؤندے جاندے سن۔ اوہناں دے مکان جدی پشتی سن۔ تھوڑی تھوڑی زمین سی جیہدے اُتے اوہناں دی گزرگزن سی۔ اک دن دتے دے گوانڈھ اک کڑی داویاہ ہویا۔ اوہنوں دا ج وچ دو (2) پلنگ وی ملے۔ دتے دے دل وچ سدھر پیدا ہوئی جے اوہ اپنی دھی نوں اک پلنگ دیوے گا۔ پلنگ دا مل اسی (80) روپے سی تے دتے کول اپنا تے بالاں دا ڈھڈکٹ کے بچے ہوئے صرف پنجاہ (50) روپے سن۔ اوہنے دوتن مہینے کجھ ہور جوڑ کے اسی (80) روپے بنائے تے بازار گیا، پر پلنگ تے اوہنوں ہتھ نہیں سی لان دیندا۔ ہن اوہدا مل ڈیڑھ سو (150) روپے ہو گیا سی۔ اوہنے دوتن مہینے ہور پیسا جوڑیا۔ ڈیڑھ سو (150) روپے کٹھے ہو گئے تے فیر بازار گیا۔ دل دی سدھر دل وچ ای لئی واپس گھر مڑ آیا۔ پلنگ ہن دو سو (200) دا ہو گیا سی۔

دتے دی دھی زبیدہ تے رحمے دی دھی رضیہ دیاں منگنیاں ہو گئیاں سن۔ رضیہ دے ویاہ دے دن مٹھے گئے۔ بھلگن دی ویہہ (20) تاریخ مقرر ہوئی۔ اللہ دیاں بے پرواہیاں دیکھو، دیتا منجی اُتے پے گیا۔ بیماری لمی ہو گئی۔ دھی دے ہتھ پیلے کرن دی سدھر پوری ہون ولوں مایوسی ہو گئی۔ اوہنے رحمے نال بڑی حسرت نال دل دی گل کیتی۔ ”یار دتے! اللہ تینوں صحت دیوے تے توں اپنی دھی دے سرتے آپ ای ہتھ رکھیں، زبیدہ میری اپنی دھی اے توں کوئی فکر نہ کر، میں اوہدہ سارا بھار چکاں گا۔“ دیتا اکھاں میٹ گیا۔ سارا بھار رحمے تے آ گیا۔ اوہ غریب سی پر قول قرار داپکا سی۔ جیاں دے ڈنگ کجھ واہی نیجی کر کے ٹور داسی تے کجھ مجھ دا دھ و بیچ کے گزارہ کر لیندا سی۔ رضیہ دے ویاہ دی تاریخ سرتے آ گئی۔ اوہنے اپنی مجھ دو ہزار (2000) روپے دی و بیچ کے بتا سار لیا تے بھار ہولا کر لیا۔ پر اوہدا جوانی تھوڑے دا ج سببوں ناراض ہو گیا۔ اوہنے دو جے ای مہینے مارکٹ کے رضیہ نوں گھروں کڈھ دیتا۔ اوہ پیکے آ بیٹھی۔

رحمے نوں اپنی دھی ولوں غم تے ہویا، پر اوہنوں زبیدہ بارے سوچ کے بوہتا فکر لگ گیا۔ اوہدے ویاہ لئی اُتو دی باراں (12) تاریخ مٹھی گئی۔ منگھیا ئی داستیاناس ہووے آسماناں تائیں اپڑ گئی۔ اوہ کناں کوڈھڈکٹ دا تے کیہ کجھ بناؤندا۔ کجھ سمجھ نہیں سی آؤندا کہ اوہ اپنی دھی دا گھر وساوے یا دوست دی دھی دے ہتھ پیلے کرے۔ رضیہ لئی اوہ کجھ نہ کر سکیا، پر یار نال کیتے ہوئے قول قرار نبھان لئی اوہنے رات دن اک کر چھڈیا۔ جدوں ویاہ دی تاریخ سرتے آ گئی تاں اوہنے اپنا مکان چھ ہزار

(6000) روپے دا ویچ دتا تے زبیدہ لئی داچ تیار کیتا۔ زبیدہ داویاہ ہو گیا۔ رحے نے سکھ داساہ لیا۔

رحما ڈولی ٹور کے اپنے گھر دے ویہڑے ویچ آیا تے اوہدی وہٹی نے طعنہ دتا کہ اپنی دھی داچ باہجوں گھر بیٹھی اے تے پرانی دھی نوں کڈی شان نال ویاہیا ٹوریا اے۔ رحے نے آکھیا کملینے ”گلاں کرنیاں سکھالیاں تے اوکھے پالن بول۔“ یارنال کیتا وعدہ نہ نبھاؤندا تے نگلا اکھواؤندا؟ رب نے چاہیا تے رضیدے سوہریاں دا اُلاہ لالاہ دیاں گا۔“

رحے نے دن رات محنت شروع کر دتی۔ زمیناں دی بیانی تے خدمت اُتے سہارا زور لادیتا۔ رب دی رحمت جوش ویچ آئی تے ایس سال فصلاں وی چونیاں ہوئیاں۔ پیسے ولوں رحے دا ہتھ واہو اسوکھا ہو گیا۔ اوہنے اپنی دھی دے سوہریاں دا اُلاہ ماوی لالاہ دتا تے رجواں داچ دے کے اوہناں دا مونہہ ہمیش لئی بند کر دتا۔

اوکھے لفظاں دے معنے

لفظ	معنے	لفظ	معنے	لفظ	معنے
گھلے ڈھلے	بغیر روک ٹوک دے	ڈھڈکٹ کے	جھکھیاں رہ کے	پگ وٹ بھرا	پگڑی وٹا کے بنے ہوئے بھرا
متھے گئے	مقرر کیتے گئے	نگلا	جیہڑا گل دا پگانہ ہووے		

مشق

- 1- ایس کہانی وچوں کیہ سبق ملدا اے؟
- 2- رحے نے اپنا مکان کیوں ویچ دتا؟
- 3- زبیدہ نال رحے دا کیہ رشتہ سی؟

میلا شالامار

پنجاب دی دھرتی میلیاں دی دھرتی اے۔ شاید ای کوئی پنڈ یا شہر اجیہا ہووے جتھے ہر سال کوئی نہ کوئی میلا یا عرس نہ ہوندا ہووے۔ کجھ میلے بزرگاں دے مزاراں تے لگدے نیں جیہناں وچ مذہبی عقیدت دارنگ شامل ہوندا اے تے کجھ میلیاں دا تعلق موسم نال اے۔ ایہہ موسی میلے وی ساڈی زندگی دا اک لازمی حصہ نیں۔



میلیاں وچ، شہری، پنڈو، امیر، غریب، بڈھے، جوان تے بچے اکوتھاں اکٹھے ہوندے نیں۔ انج میلے دیاں رونقاں تے خوشیاں دوہریاں ہو جاندیاں نیں۔ میلا شالامار جیہنوں میلا چراغاں وی کہیا جاند اے، شالامار باغ دے کول شاہ حسین رحمۃ اللہ علیہ دے مزار تے ہر سال مارچ دے مہینے دے آخری ہفتے وچ دھوم دھام نال لگدا اے۔ میلا شالامار اصل وچ فصلاں دے پکن دی خوشی وچ منایا جاند اے۔ کیوں جے ایس میلے مگروں کنکاں دی واہڈی شروع ہو جاندی اے۔ میلا شالامار باغ بڑا تاریخی میلا وی اے۔ پرانیاں تاریخی کتاباں تے وڈیری عمر دے لوک دسدے نیں پئی پہلے وقتاں وچ ایہہ میلا بڑے ٹھاٹھ نال لگدا سی۔ لاہور دے وسنیک تے میلے دے شوقین میلے توں پہلاں باغ دے اندر چھولداریاں لالیندے سن تے جتے دیہاڑے میلا رہندا سی، اوہ وی اتھے ای رہندے سن۔ دعوتیاں ہوندیاں، دن ویلے باغ دی سیر کردے تے رات نوں تو الیاں، جھلاں تے میلے دیاں ہور رونقاں ویکھدے۔ باغ تے مزار تے روپ چڑھیا ہوندا سی۔ فواریاں والیاں نہراں دے دوالے تے شاہ حسین رحمۃ اللہ علیہ دے مزار تے دیویاں دی لوہندی تے سارا باغ دیویاں نال بھریا نظر آؤندا سی۔

ویلے دے نال نال ایہہ گلاں تے ندرہیاں پر میلا ویکھن والیاں دے شوق وچ کوئی ایڈا فرق نہیں پیا۔ پہلاں میلا باغ دے اندر لگدا سی، پر ہن ایہہ باغ دے باہر لگدا اے۔ ایس واسطے کہ باغ دی خوبصورتی وچ فرق نہ پوے تے نالے بوٹے وی لوکاں دے پیراں دی لتاڑی توں بچے رہن۔

آج وی میلے دی رونق ویکھن والی ہوندی اے۔ محکمہ اوقاف تے ادبی انجمنوں ولوں شاہ حسین رحمۃ اللہ علیہ دے مزار تے فاتحہ خوانی کیتی جاندی اے تے پھلاں دیاں چادراں چڑھائیاں جاندیاں نیں، دیوے بالے جاندے نیں، بھنڈارے وندے جاندے نیں۔ ملنگاں دیاں ٹولیاں ڈھولوں دے ڈگیاں تے لڈی تے بھنگڑے پاؤندیاں نیں۔ لوک ایس صوفی شاعر دے مزار تے منتاں مندے نیں، جیہڑا اپنی ساری حیاتی نفرت، تنگدلی تے ویرمکاؤن لئی انسان دوستی، پیار تے خلوص وادرس دیندا رہیا۔ چار چوہیرے رنگ برنگیاں دکاناں سجیاں ہوندیاں نیں۔ کتے مٹھائی کتے کھڈاؤنے وک رہے ہوندے نیں، تے ایہناں دکاناں تے دب وکری ہوندی اے۔ پنگھوڑے، تھیڑ تے سرکس ویکھن والیاں دی بھیڑ ہوندی اے۔

ایہہ میلا حضرت شاہ حسین رحمۃ اللہ علیہ دی یاد وچ لگدا اے جیہڑے پنجابی دے سرکڑھویں شاعر نیں۔ شاہ حسین رحمۃ اللہ علیہ نصیر الدین ہمایوں بادشاہ دے سٹے 1538ء وچ جتے تے جلال الدین اکبر بادشاہ دے عہد وچ پروان چڑھے۔ ایہناں دے وڈو ڈیریاں اسلام قبول کیتا۔ اوہناں دے والد داناں شیخ عثمان سی۔ شاہ حسین رحمۃ اللہ علیہ نے اپنی جوانی بڑی سخت عبادت تے پرہیزگاری وچ گزاری۔ دن نوں روزے رکھدے تے ساری ساری رات دریا دے کٹڑھے قرآن مجید دی تلاوت کردے یا نفل پڑھدے۔ اک دن اوہناں تفسیر وچ پڑھیا کہ دنیا دی حیاتی اک کھیڈ اے۔ ایہہ پڑھدیاں اوہناں تے عجیب مستی طاری ہوگئی۔ نچدے گدے مسیت توں باہر نکلے تے فیر ساری عمر ایس مستی وچ ای لنگھاوتی۔

ایہہ میلے ایس لئی بڑے ضروری نیں کہ ایہناں راہیں میل جول تے ملاقات دے موقعے ملدے نیں۔ مختلف علاقیاں دے لوک میلیاں وچ شریک ہوندے نیں۔ انج آپوں وچ پیار تے محبت و دھدی اے تے خرید و فروخت دے نال میلے دے بہانے لوکاں نوں تفریح وی لبھ جاندی اے۔

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
لتاڑے جان	مدھے جان	سرکڑھویں	اُچے مرتبے والے	چھولداری	اک قسم داتنبو	وکری	چیراں دا وکنا

مشق

- 1- میلا شمالا مارکدوں تے کیہڑی تھاں لگدا اے؟
- 2- میلا شمالا مارکس صوفی بزرگ دی یاد وچ منایا جاند اے؟
- 3- کسے میلے دا اکھیں ڈٹھا حال لکھو؟

پاکستان دی کہانی

انگریزاں نے بڑی چالاکی نال مغلاں کولوں ہندوستان داراج کھوہ لیا تے آپ ہندوستان دے حاکم بن بیٹھے۔ اوہناں نے ہندوآں نوں اپنے نال ملا کے مسلماناں اُتے تظلم کرنے شروع کر دتے۔ انگریزاں نے ہندوآں نوں حکومت وچ وڈے وڈے عہدیاں نال نوازیاء تاں جے اوہ انگریزاں دے وفادار رہن تے اوہناں نوں ہندوستان اُتے حکومت کرن وچ مدد دین۔ اوہناں دے مقابلے وچ وچارے مسلماناں نوں چڑاسی، دفتری، اردلی تے چوکیدار بھرتی کیتا گیا۔

سرسید احمد خاں نے جدوں مسلماناں دی ایہہ بد حالی تے ذلت دیکھی تے اوہناں کولوں رہیا نہ گیا تے اوہناں نے مسلماناں نوں تعلیم دین دا فیصلہ کیتا تے ایس کم لئی علی گڑھ وچ اک سکول کھولیا، جیہڑا ہولی ہولی ترقی کر کے پہلاں کالج تے فیر یونیورسٹی بن گیا۔ علی گڑھ یونیورسٹی دے پڑھے ہوئے گھبر و حکومت دیاں وڈیاں نوکریاں حاصل کرن لئی ہندوآں دے مقابلے تے ڈٹ گئے۔ ایس طراں نہ صرف مسلمان پڑھ لکھ گئے سگوں حکومت دے کئی وڈے وڈے عہدے وی اوہناں دے ہتھ آ گئے۔

ہندوآں نے جدوں دیکھیا پئی مسلمان ہر میدان وچ اوہناں دے مقابلے وچ کھلو گئے نیں اوہناں نے اک نویں کھیڈ کھیدی۔ 1885ء وچ اوہناں نے اک انگریز ”ہیوم“ نال مل کے اک سیاسی جماعت ”انڈین نیشنل کانگریس“ بنائی، جیہدا مقصد ایہہ ظاہر کیتا گیا پئی کانگریس ہندوستان دے وسنیکاں دے حق دی حفاظت تے آزادی لئی بنائی گئی اے، پر اصل وچ ہندو ایس ملک دی حکومت اپنے ہتھ وچ لے کے مسلمانوں نوں ساری حیاتی لئی اپنا غلام بناؤنا چاہندے سن۔ مسلمان وی بڑیاں تیز نظراں رکھدے سن۔ اوہ جھب ہندوآں دی نیت تاڑ گئے تے ایہناں دناں وچ مسلماناں نے اپنی اک دکھری جماعت ”مسلم لیگ“ دے ناں نال بنائی۔ اوس ویلے قائد اعظم محمد علی جناح رحمۃ اللہ علیہ کانگریس وچ شامل سن، پر اوہ مسلم لیگ تے کانگریس دے وچکار صلح صفائی دیاں کوششاں کردے رہندے سن۔

1913ء وچ قائد اعظم محمد علی جناح رحمۃ اللہ علیہ نے محسوس کیتا پئی کانگریس ہندوستانی مسلماناں نال دھرو کر رہی اے۔ ایس کر کے اوہ کانگریس نوں چھڈ کے مسلم لیگ وچ شامل ہو گئے۔ فیرون رات مسلماناں دے حقوں دی حفاظت تے آزادی لئی محنت کرن لگ پئے۔ قائد اعظم محمد علی جناح رحمۃ اللہ علیہ دے مسلم لیگ وچ شامل ہون نال مسلم لیگ دے جُتے وچ اک نویں روح آ گئی۔

قائد اعظم رحمۃ اللہ علیہ نے 25 مارچ 1929ء نوں دہلی وچ مسلم لیگ دا وڈا جلسہ کیتا، تے چوداں نکات دے ناں نال کجھ

منگیاں پیش کیتیاں، جیہناں وچ مسلماناں دے تھاں دی حفاظت، صوبیاں دی خود مختاری، اسلامی رہت بہت دی ترقی، مسلماناں دی تعلیم ول دھیان تے مسلماناں لئی وڈیاں وڈیاں نوکریاں دا حاصل کرنا سی۔ ایس توں اڈوزارتاں وچ مسلماناں دی نمائندگی دا مطالبہ کیتا گیا۔ قائد اعظم رحمہ اللہ علیہ دے ایہناں چوداں کلکتیاں نے انگریزاں نوں بھڑتھو پادیتا تے ہندووی ڈور بھورے ہو گئے۔ ایس توں پہلاں سرسید احمد خاں ایہہ گل دس چکے سی پئی ہندوستان وچ دو وڈیاں قوماں آباد نیں، اک مسلمان تے دوجی ہندو۔ ایہناں دونوں قوماں دا مذہب تے رہت بہت اک دوجے توں وکھری اے۔ ایس لئی ایہناں قوماں دا اک تھاں نباہ نہیں ہو سکدا۔ سرسید احمد خاں دی ایس گل توں ای دو قومی نظریہ پیدا ہو یا جیہڑا بعد وچ ”نظریہ پاکستان“ دی نینہ بنیا۔

1930ء وچ الہ آباد، مسلم لیگ دا اک وڈا کٹھ ہویا، جیہدی صدارت ساڈے مشہور قومی شاعر علامہ اقبال رحمہ اللہ علیہ ہوراں کیتی۔ اوہناں نے اپنی صدارتی تقریر وچ آکھیا پئی: ”میں چاہندا ہاں کہ پنجاب، شمال مغربی سرحدی صوبہ، سندھ تے بلوچستان دے علاقے ملا کے اک ریاست بنا دتی جاوے۔ مینوں انج چا پدا اے پئی برطانوی حکومت دے ایس دور وچ اک خود مختار مسلم ریاست مسلماناں دا مقدر بن چکی اے تے ایس خیال نال ہندو آں تے انگریزاں نوں کسے قسم دا فکر نہیں ہونا چاہیدا۔ ہندوستان وچ مسلماناں دی تعداد بوہت زیادہ اے۔ ایس لئی اک اچھا علاقہ مسلماناں لئی وکھرا کر دتا جائے جتھے مسلمان آزادی نال رہ سکوں۔ ایس کر کے میں منگ کردا ہاں کہ ہندوستان وچ اک مضبوط مسلم ریاست بنائی جاوے۔“

علامہ اقبال رحمہ اللہ علیہ دی ایس تقریر نال مسلماناں دے دلاں وچ اک نواں جوش تے عزم پیدا ہو گیا، پئی مسلماناں لئی اک وکھرا دیس ہونا چاہیدا اے۔ چودھری رحمت علی نے 1933ء وچ اک تاریخی اعلان شائع کیتا جیہدے وچ کیہا گیا پئی ہندوستان اک ملک نہیں، ایس وچ بوہت ساریاں قوماں آباد نیں تے مسلمان ہور ساریاں قوماں نالوں وکھرے نیں۔ ایہناں دیاں رسماں، رواج، تاریخ، سماجی ناتے، شادی ویاہ تے وراثت دا قانون ساریاں قوماں نالوں وکھرے نیں۔ ایس لئی مسلماناں واسطے اک وکھرا ملک ہونا ضروری اے تے اوس ملک داناں ”پاکستان“ ہونا چاہیدا اے۔

چودھری رحمت علی دی ایس تجویز نوں مسلماناں نے پسند کیتا تے اوہناں نے قائد اعظم محمد علی جناح رحمہ اللہ علیہ دی اگوائی وچ پاکستان دا مطالبہ شروع کر دتا۔ انیر 23 مارچ 1940ء نوں لاہور دے منٹو پارک (موجودہ گریڈ اقبال پارک) وچ مسلم لیگ دا اک تاریخی جلسہ ہویا۔ ایس جلسے دی صدارت قائد اعظم محمد علی جناح رحمہ اللہ علیہ نے فرمائی۔ اوہناں نے اپنی صدارتی تقریر وچ فرمایا ”جے برطانوی حکومت چاہندی اے کہ ہندوستان وچ امن امان رہوے تے اوس نوں چاہیدا اے پئی ہندوستان نوں مسلماناں تے ہندو آں وچ ونڈ پوے۔“

ایس جلسے وچ مولوی فضل الحق نے پاکستان دی قرارداد پیش کیتی جیہدا مطلب ایہہ سی کہ ہندوستان دے جیہڑے

جیہڑے علاقیاں وچ مسلماناں دی اکثریت اے، اوہناں نوں آپوں وچ ملا کے اک آزاد، خود مختار اسلامی ریاست بنا دتی جاوے۔ نالے اقلیتاں دے ہر طراں دے حق حقوق دی پوری حفاظت کیتی جاوے۔ ایہہ قرارداد منظور کر لئی گئی۔ ایس طراں اک اسلامی ریاست دا تصور کھل کے سامنے آ گیا۔ بیگم محمد علی جوہر نے ایس قرارداد نوں ”پاکستان دی قرارداد“ داناں دیتا۔ فیر پاکستان حاصل کرن لئی تھیں تھیں تے جلسے تے جلوس شروع ہو گئے۔ انگریزاں تے ہندوآں نے ایس قرارداد دی رج کے مخالفت کیتی۔ ہندوآں نے آکھیا پئی بھارت ماتا دے ٹوٹے نہیں ہون دیواں گے۔ انگریزاں نے تڑھی لائی کہ آسانوں ہندوستان وچوں کوئی کڈھ نہیں سکدا۔ پر مسلماناں اوہناں دی کوئی چال کامیاب نہ ہون دتی۔

اخیر قائد اعظم محمد علی جناح رحمۃ اللہ علیہ دیاں کوششاں نال 14 اگست 1947ء نوں مسلماناں دی آزاد اسلامی ریاست ”پاکستان“ بن کے رہی۔ بوہت سارے مسلمان ہندوستان توں ہجرت کر کے پاکستان آ گئے۔ ہندوآں تے سکھاں نے اوہناں اُتے بڑے ظلم کیتے۔ اوہناں دے بھرے گھر لٹ لئے۔ جواناں بالاں تے بڈھیاں نوں قتل کر دیتا تے مسلمان اپنا سبھ کجھ لٹا کے وی ایس گلے خوش سن پئی اوہناں دیاں قربانیاں ضائع نہیں گئیاں تے پاکستان بن گیا اے۔ پاکستان دے پہلے گورنر جنرل قائد اعظم رحمۃ اللہ علیہ بنے۔

اوکھے لفظاں دے معنے

لفظ	معنے	لفظ	معنے	لفظ	معنے
نینہہ	بنیاد	منگاں	مطالبے ، لوڑاں	اگوائی	رہنمائی
ہجرت	اپنا گھر بار چھڈ کے دوجی تھیں ٹر جانا	جھب	جلدی	بھڑ تو پا دیتا	وخت پا دیتا

مشق

- 1- اوہ کیہ حالات سن جیہناں پاروں پاکستان دی لوڑ محسوس کیتی گئی سی؟
- 2- علامہ اقبال رحمۃ اللہ علیہ نے الہ آباد دے جلسے وچ کیہ آکھیا سی؟
- 3- قرارداد پاکستان کس نوں آکھدے نیں۔ ایہہ کدوں تے کتھے منظور ہوئی؟

اَسیں آں پاکستانی

اَسیں آں پاکستانی سارے ، اَسیں آں پاکستانی
 دیس دی خاطر دے سکے آں ہر شے دی قربانی
 اَسیں پٹھان آں اَسیں بلوچی ، سندھی تے پنجابی
 کھڑے ہوئے آں اِکو بُوٹے اُتے پھل گلابی
 اَسیں آں پاکستانی اِکو مہک تے اِکو رنگ اے، قدوں عمروں ہانی
 موڈھے نال جے موڈھا لایئے، وا وی چیر نہ سکے
 سانوں ویکھ کے رہ جانے نیں ویری ہکے بکے
 اَسیں آں پاکستانی طوفاناں جے عزم اساڈے ، جذبہ ہڑ دا پانی
 جان تے اِک اے، جسم بھانویں وکھرے وکھرے حصے
 ساڈی سانجھ تے ایکے والے زندہ رہن گے قصے
 اَسیں آں پاکستانی اِک دو جے دا ہتھ ونڈا دے اِک دو جے دے جانی
 حالی تے سرسید والی سوچ اَسیں اپنایئے
 قائد اعظم تے اقبال دی راہ اُتے اُتے جانیئے
 ساڈا آگو، ساڈا رہبر ایہہ جذبہ لاثانی
 اَسیں آں پاکستانی (عبدالکریم قدسی)

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے	لفظ	معنے	لفظ	معنے
ہانی	اِکو عمر دے	ہکے بکے	حیران	عزم	ارادہ	ہڑ	سیلاب	سانجھ	ایگا، اتفاق	آگو	رہبر

مشق

1- ایس نظم دا مطلب آسان لفظاں وچ بیان کرو۔

2- شاعر نے آخری بند وچ کیہ تلقین کیتی اے؟

سائنس دے کرشمے

سائنس کیا ہے؟

سائنس انگریزی زبان دالفظ اے۔ ایہدا مطلب پڑچول کرنا، بھال کرنا، مشاہدے تے تجربے دی روشنی وچ کسے شے نوں جاننا، انسان دے فائدے واسطے نویاں نویاں ایجاداں کرنا۔ انساناں دی زندگی دی سہولت، وڈیائی تے ترقی واسطے بوہت کجھ بنایا جھکیا اے تے رہندی دنیا تیک سائنس ترقی کردی رہوے گی۔

ترقی دیاں منزلاں

- 1- کسے زمانے وچ لوک جنگلاں تے غاراں وچ رہندے سن، جنگلی تے وحشی سن۔ اوس دور دے کجھ سیانے بندیاں تجربے راہیں ہتھیاراں دی لوڑ محسوس کیتی، تاں جے خونخوار تے ڈاڈھے جانوراں کولوں اپنا بچا کیتا جاسکے۔ اوہناں دی سائنس نے پتھر دے ہتھیار وغیرہ ایجاد کیتے تے اوہناں کولوں کئی کم لئے۔ ایس زمانے نوں ”پتھر دا زمانہ“ آکھیا جاند اے۔
- 2- سائنس نے ہور ترقی کیتی تے لوکاں نے غاراں نوں چھڈ کے مکان بناؤن دی جاج سکھی۔ پنڈ گرانواں وچ قبیلے بن کے رہنا شروع کیتا۔ چیزاں تے ہتھیار وغیرہ لوہے تے دوسریاں دھاتاں دے بناؤن شروع کیتے تے فیر انسان ترقی کردا کر دما مشینی دور تے ایٹی دور وچ داخل ہو گیا تے ہن خلائی دور وچ پہنچ گیا اے۔

انسان دی ضرورت

کہندے نیں ضرورت ایجاد دی ماں ہوندی اے۔ دنیا اُتے جیہڑی وی چیز سانوں نظر پیندی اے، اوہنوں انسان دی ضرورت نے بناؤن اُتے مجبور کیتا اے۔ چھوٹے ہتھیاراں توں لے کے ایٹم بم تک، ہیل گڈیاں توں لے کے ہوائی جہازاں تک کجھ وی نہیں بناسی۔ ایس جہان دی ساری رونق انسان دیاں ضرورتاں دے سببوں اے۔

سبھ توں وڈا سائنس دان

سبھ توں وڈا سائنس دان اوہ سی جیسے پہیا بنایا، پراوس پہیا ایجاد کرن والے سائنس دان دا کسے نوں ناں پتا ای یاد نہیں۔ تاریخ دان کہندے نیں کہ کسے زمانے وچ کوئی بندہ کسے پہاڑ اُتے پتھر اں نال کوئی کم کر رہیاسی، اوہدے کولوں اک چورس پتھر ڈگ پیاتے اوہنے دیکھیا کہ اوہ پتھر ڈھلوان اُتے رڑھن لگ پیا، پرتھوڑی دور جا کے اوہ پتھر رک گیا۔ اوس بندے نے اک گول پتھر چک کے پہاڑ اتوں ریڑھ دتا، اوہ پتھر رڑھدا رڑھدا دُور زمین تک چلا گیا۔ ایس تجربے توں اوہنوں پہیا بناؤن دا خیال آ گیا۔

انسانی زندگی وچ انقلاب

بیل گڈی، اُوٹھ گڈی، گھوڑا گڈی، بگھی، سائیکل، موٹر سائیکل، موٹر کار، ٹرک، بس، ریل گڈی، ہوائی جہاز تے ہور لکھاں قسم دیاں مشیناں اُج پہنئے دیاں محتاج نیں۔ جے پہیانہ ہوندا تے اُج شاید ایہہ لکھاں قسم دیاں چیزاں تے مشیناں کدی وی نہ بنائیاں جاسکدیاں۔

سفر دیاں سہولتاں

انساناں دی ہمیش ایہہ خواہش رہی اے کہ ایس دنیا نوں بوہتے توں بوہتا دیکھے، پراہیدے واسطے صرف پیدل چل کے کم نہیں سی چلدا۔ دو جا چیزاں وستاں وی اک تھان توں دوسری تھان تے نہیں لے جائیاں جاسکدیاں۔ ایس ضرورت نے سائیکل، موٹر سائیکل، موٹراں، گڈیاں تے ہوائی جہاز تے ہور سینکڑوں چیزاں بنوائیاں۔

کمپیوٹر

چین دے وسنیکاں نے اک ایسی مشین ایجاد کیتی جس دے نال حسابی سوال آسانی نال حل کیتے جان لگ پئے۔ ایس مشین نوں ”اباکس“ دانان دتا گیا۔ سائنسی میدان وچ جویں جویں ترقی ہوندی گئی۔ اباکس وی اپنی شکل تبدیل کر کے کمپیوٹر دی شکل اختیار کر گیا۔ ایہو وجہ اے کہ ”اباکس“ نوں دنیا دا پہلا کمپیوٹر منیا جاندا اے۔ پر اُج زندگی دے ہر میدان وچ کمپیوٹر انسان دی خدمت کر رہیا اے، اوہ ویلہ دور نہیں جدوں ہر کم کمپیوٹر کولوں لیا جائے گا۔

بجلی دی طاقت

پرانے زمانے دے لوک جد بدلاں وچوں سخت طوفان تے بارش ویلے جیہڑی بجلی چمکدی، اوہ کدی کدی زمین اُتے ڈگ کے اگ لادیندی۔ اوہنوں اوہ آسمانی آفت سمجھدے سن۔ اک دن اک آدمی گڈی اڈا رہیاسی۔ آسمان تے بدل گج رہے سن۔ بجلی چمکی تے اوس گڈی اڈاؤن والے دے ہتھ نوں جھٹکا لگا تے اوہ سوچیں پے گیا کہ اُنج کیوں ہو یا اے۔ فیر اک بندے نے گڈی نوں ڈوردی تھان باریک تار بنھ کے اڈایا۔ اوس نے تار وچ گڈی دیاں تناواں کول اک پتل دی چابی لکاوٹی۔ اوہ چابی اتقا تئاواں کولوں کھل گئی تے تار نال رگڑ کھانندی ہوئی گڈی اڈاؤن والے دے ہتھ کول آگئی۔ ایس عمل وچ تار نوں رگڑاں لگن نال کئی تھانواں اُتے لشکارا پیدا ہو یا تے بندے دے ہتھ نوں وی جھٹکا لگا۔ ایس طراں ایہہ سمجھ آئی کہ بجلی رگڑ لگن نال پیدا ہوندی اے۔ امریکہ دے اک بندے ایڈیسن نے ایس سوچ تے خیال نوں ساہمنے رکھ کے تجربے کرنے شروع کردتے تے اخیر بجلی پیدا کرن وچ کامیاب ہو گیا۔ فیر بجلی دی ایجاد توں سائنس دانان نے لکھاں چیزاں بنا دتیاں۔ اُج بجلی دابلب، بجلی دیاں موٹراں، ریفریجریٹر، ایئر کنڈیشنر، سینما، ٹیلی فون، کمپیوٹر، ریڈیو، ٹیلی ویژن، غرض ہر چیز بجلی دی محتاج اے۔

بجلی کو لوں حفاظت

بجلی جتنے بوہت فائدہ مند اے، اوتھے بڑی خطرناک وی اے۔ بجلی پانی، گلے چیز تے ہر قسم دیاں تنگیاں تاراں نال لگ جاوے تے کرنٹ پے جاندا اے۔ بجلی ربڑ، سکی لکڑی تے پکائی ہوئی خشک مٹی وچوں نہیں گزر سکدی۔ بجلی داکم کرن والیاں نوں ایہناں چیزاں دا خیال رکھنا چاہیدا اے۔

ہوائی جہاز

انسان نے سُر ت سنبھالی تے پرندیاں نوں اڈ دیاں ویکھ کے اوہدے دل وچ وی اڈن دی سدھر پیدا ہوئی۔ اوہنے کدی وڈے وڈے پرائیپیاں بانہواں نال۔ بنھ کے اڈن دی کوشش کیتی، کدی چھتیریاں نال اڈن دی کوشش کیتی۔ کدی غباریاں وچ ہوا بھر کے اوہدے سہارے اڈن دا چارا کیتا۔ اخیر امریکہ وچ رہندے دو بھرا ہوائی جہاز بناؤن وچ کامیاب ہو گئے۔

ریڈیو تے ٹیلی ویژن

سائنس دانوں سوچیا کہ اک بندے دی آواز دُور کسے بندے تک کس طراں پہنچ جاندی اے۔ سائنس دانوں دے تجربیاں توں پتا لگا کہ قدرت نے ہوا تے فضا وچ ایس قسم دیاں لہراں پیدا کیتیاں ہویاں جیہڑیاں کسے آواز نوں دور تک پہنچا دیندیاں نیں۔ جتنے زور نال کوئی آواز دیوے گا اوہ اوہی دور چلی جاوے گی۔ فیر سائنس دانوں تجربیاں نال ایہہ وی پتا لگ گیا کہ بجلی دی طاقت نال آواز نوں ساری دنیا تک پہنچایا جاسکدا اے۔ ٹیلی فون، ریڈیو تے ٹیلی ویژن ایس اصول نوں ای ساہمنے رکھ کے بنائے گئے۔

تصویر تے کیمرے دی کہانی

کدی تسیں ویکھیا ہووے گا کہ کمرے دے باہر گزرن والے بندے دا سایہ کسے سوراخ وچوں کمرے وچ پٹھا چلدا جا پدا اے۔ ایس خیال نے سائنس دانوں نوں تجربے کرن تے مجبور کیتا تے کیمرے دی ایجاد ہو گئی۔

فلم دیاں تصویراں

کیمرے دی ایجاد ہوئی تے سائنسدان تصویراں اُتے تجربے کرن لگ پئے۔ جے اک آدمی دے ہتھ وچ تلوار ہووے۔ اوہ پہلاں ہتھ چک کے تصویر کچھاوے۔ فیر ہولی ہولی ہتھ تھلے لیاؤندا جاوے تے نال نال تصویر کچھاؤندا جاوے تے اوہ ساریاں تصویراں ترتیب وار اکٹھیاں کر کے جے انسان دی نظر ساہمنے گزریاں جان تے انج لگ دا اے جو ایس اوہ بندہ تلوار چلا رہیا اے۔ ایس تجربے پاروں سینے وچ چلن والی فلم تیار ہوئی۔

راکٹ دی ایجاد

آتش بازی دے نظارے اسیں اکثر ویکھنے آں۔ آپ وی ہوائیاں چلا کے مزہ لینے آں۔ راکٹ وی ایس اصول نال

بنایا گیا ہے۔ یعنی ہوائی دے اندر بارود ہوندا ہے تے آگ لاؤن واسطے اک پھیتے ہوندا ہے۔ اوہدے نال سیدھ قائم رکھن واسطے اک کانایا لکڑی لا دیندے نیں۔ پھیتے نوں آگ لایئے تے اوہ آگ بارود تیک پہنچ جاندی اے تے ہوائی آسمان ول اُڈ جاندی اے۔ راکٹ وچ بوہت زیادہ طاقت ور بارود بھر کے اوہنوں ہوائی دے اصول مطابق اُڈایا جاند اے تے مشیناں نال اوہدی سیدھ ٹھیک رکھی جاندی اے۔ انج راکٹ راہیں انسان چن تیکر جا پہنچیا اے۔

سائنس دے کرشمے

بجلی دے بلب توں لے کے استری، ریفریجریٹر، ایرکنڈیشنر، کپھے، ہیٹ تے ہور سینکڑوں مشیناں سبھ سائنس دے کرشمے نیں۔ مکدی گل ایہہ کہ انسان نے جئی ترقی کیتی اے، سبھ ضرورت، سائنسی علم، تجربے تے عمل دے سببوں اے۔

سائنس پاروں تباہی

انساناں نے ایس سائنس دے علم نال لکھاں فائدے مند چیزاں بنایاں نیں، پر لکھاں چیزاں تباہی پھیرن والیاں وی بنادتیاں نیں۔ ایٹم بم، ہائیڈروجن بم جیہناں دے استعمال نال دنیا اک منٹ وچ تباہ ہو سکدی اے۔

اوکھے لفظاں دے معنے

لفظ	معنے	لفظ	معنے	لفظ	معنے
پڑچول	تحقیق، چھان پھٹک، تلاش	جاچنا پرکھنا	کسے چیز نوں سمجھنا سوچنا	ورتاوا	آپس وچ مل ورتن
پٹھا	اُلٹا	انقلاب	تبدیلی	مشاہدہ	دیکھن بھالن
ایجاداں	نویاں چیزاں بناؤنا	ڈاڈھے	زبردست، تگڑے	تاریخ دان	زمانے دا حال لکھن والا
قبیلہ	اکو برادری دے لوک				

مشق

- 1- سائنس کس چیز یا علم داناں اے؟
- 2- کمپیوٹر سبھ توں پہلے کس نے ایجاد کیتا؟
- 3- سبھ توں وڈا سائنس دان کون سی؟
- 4- بجلی کولوں کس گل دا خطرہ اے تے اوہدا بچا کرن واسطے کیہڑے طریقے نیں؟
- 5- سائنس ایس دنیا دی تباہی دا موجب کنج بن سکدی اے؟

ربا اپنا کرم کما

ربا اپنا کرم کما، علم دے دیوے بال دکھا
 ذہناں اندر چانن لاء، ربا اپنا کرم کما
 روز سکولے آئیے جاییے
 نال کتاب پیار ودھائیے
 چنگیاں طالب علماں دے وچ
 اپنا ناں وی درج کروائیے
 سانوں سدھے رستے پا ، ربا اپنا کرم کما
 استادان دا مینیے کہنا
 عملاں دا گل پائیے گہنا
 بھانویں پوے مصیبت سہنا
 اک دوجے دا درد ونڈائیے
 سانوں نیک انسان بنا ، ربا اپنا کرم کما
 جتھے علماں دا نہیں ڈیرا
 اوتھے کردا راج ہنیرا
 علم دیاں جد بلن مشالاں
 ویہڑے ہوندا تدوں سویرا
 سانوں وی کر علم عطا، ربا اپنا کرم کما
 (سلیم کاشر)

اوکھے لفظاں دے معنے

لفظ	معنے	لفظ	معنے	لفظ	معنے
چانن	روشنی	درج کرائیے	لکھوائیے	عطا کر	بخش دے

مشق

- 1 جتھے علم نہ ہووے اوتھے کیہ ہوندا اے؟
- 2 شاعر نے نظم وچ کیہڑیاں گلاں دی تمنا کیتی اے؟

ساڈے شیر، شہید وطن دے

پاکستان بن جان مگروں بہادراں نے اپنے وطن دی حفاظت کرن لگیاں کسے ویلے وی اپنی جان دی پرواہ نہیں کیتی۔ اپنے پیارے وطن پاکستان دی خاطر جان دی بازی لادین والے جواناں دا اتھے ذرا وی گھانا نہیں۔ اسیں تہانوں دس بوہت وڈے بہادر دلیر تے شہیداں دی گل سناؤ نے آں جنہاں نوں سبھ توں وڈا قومی نشان ”نشان حیدر“ ملیا۔

1- کیپٹن سرور شہید رحمۃ اللہ علیہ

پاکستان بن دے تھوڑے چر پچھوں بھارت نے کشمیر تے قبضہ کر لیا۔ اگلے سال کشمیر وچ آگے ودھن دی کوشش وچ

اک پہاڑی تے مورچہ بنا لیا تے اوہدے ارد گرد لوہے دیاں تاراں لاد تیاں۔



پہاڑی توں دشمن پاکستانی فوجاں تے بمباری کر رہیا سی ایس لئی اوس پہاڑی تے قبضہ کرنا بڑا ضروری سی۔ دن چڑھن توں پہلاں کیپٹن سرور شہید رحمۃ اللہ علیہ اپنے تھوڑے جیبے جواناں نال دشمن دے مورچے ول ودھے تے دیکھدیاں ای دشمن نے فائر کھول دتا کئی جوان شہید ہو گئے تے کیپٹن سرور رحمۃ اللہ علیہ دی اک بانہہ وی بیکار ہو گئی پر اوہناں نے ہمت نہ ہاری تے مورچے دے دوالے لگی کنڈیاں دی تارنوں کٹن وچ جے رہے۔ ایسے چرنوں اوہناں دے ساتھی دشمن تے ٹٹ پئے۔ گھسماں دی لڑائی وچ اک گولی لگن نال کیپٹن سرور رحمۃ اللہ علیہ شہید ہو گئے پر اوہناں دے ساتھیوں نے پہاڑی تے قبضہ کر لیا۔ اوہ پہلے شہید سن جیہناں نوں ”نشان حیدر“ ملیا۔

2- میجر محمد طفیل شہید رحمۃ اللہ علیہ

1951ء دی گل اے۔ بھارت دیاں فوجاں نے پرانے مشرقی پاکستان

دے علاقے لکشمی پور تے ناجائز قبضہ کر لیا۔ حکومت نے میجر محمد طفیل رحمۃ اللہ علیہ نوں ایس خاص فوجی مہم اُتے بھیجن دا فیصلہ کیتا۔ رات دے ہنیرے وچ میجر محمد طفیل رحمۃ اللہ علیہ نے اپنے جواناں سمیت دشمن دے مورچے ول ودھنا شروع کر دتا۔ اوہ دشمن دے مورچیاں دے بالکل نیڑے سن کہ دشمن نوں پتا لگ گیا۔ اوہناں تے دشمن دیاں گولیاں تے بمباں دامینہہ پین لگ گیا۔ تن گولیاں



میجر طفیل رحمۃ اللہ علیہ دے سینے وچ آوجیاں پر اوہ اگے ودھدے گئے۔ جُجے وچوں بوہتا خون بہہ جان پاروں اخیر ڈگ پئے۔ اک بھارتی کمانڈر اوہناں کولوں لنگھن لگاتے آپ نے لت اڑا کے اوہنوں ڈیگ لیا تے لوہے دی ٹوپی نال ای کٹ کٹ کے ادھ مویا کر چھڈیا۔ فیر اوہناں نے اپنے جواناں نوں حکم دتا دشمن نس گیا اے۔ ایس بھارتی کمانڈرنوں قیدی بنا لوو۔ ایہہ آخری حکم دے کے وطن دی آن تے شان توں قربان ہو گئے۔ ایس بہادری پاروں اوہناں نوں ”نشان حیدر“ ملیا۔

3- میجر راجہ عزیز بھٹی شہید رحمۃ اللہ علیہ



ستمبر 1965 دی جنگ وچ بی آر بی نہر دے پل تے دشمن نے قبضہ کر لیا۔ ایس سرحدنوں برکی محاذ آکھیا جاندا اے۔ میجر عزیز بھٹی رحمۃ اللہ علیہ نوں جدوں پتلا لگا اوہناں نے اپنے فوجیاں نوں دو حصیاں وچ ونڈ کے مشین گن نال دشمن تے وار کرنا شروع کر دتا۔ اوہناں دا جانی تے مالی نقصان کر کے نہر دے کنڈھے تے اپڑ کے اوہناں نے اپنی فوج نوں نویں سرے ترتیب دے کے لڑائی شروع کر دی۔ دن رات لڑ دیاں 120 گھنٹے لنگھ گئے تے اوہناں نوں آرام کرن لئی آکھیا گیا۔ پر اوہ بغیر آرام کیتے دشمن دا مقابلہ کردے رہے تے دشمن نوں لاہور ول اک انچ وی نہ ودھن دتا تے اخیر لڑدے لڑدے شہید ہو گئے۔ شہادت مگروں اوہناں نوں ”نشان حیدر“ دتا گیا۔

4- راشد منہاس شہید رحمۃ اللہ علیہ



پہلے فضائی فوج دے افسر سن جیہناں نے 20 سال دی عمر وچ ”نشان حیدر“ دا اعزاز پایا۔ 20 اگست 1971ء نوں سویرے یاراں وجے اپنے جہازنوں لے کے سکھلائی کرن واسطے اڈن ای والے سن جے اک غدار افسر مطیع الرحمن کد کے جہاز وچ بہہ گیا تے کلوروفارم نال بھجیا ہو یا رومال راشد دے مونہہ اُتے رکھ دتا پر بے ہوش ہوون توں پہلاں راشد نے اپنے ہیڈ کوارٹرنوں وائرلیس اُتے اطلاع دے چھڈی پئی ایہہ جہاز اغوا ہو رہیا اے۔ ایسے چرنوں غدار افسر نے جہازنوں ہوا وچ اڈالیا سی۔ راشد منہاس نے اپنا پورا زور لاکے جہاز دا کنٹرول غدار افسر کولوں کھوہ لیا تے جہاز دارخ زمین ول موڑ دتا۔ اک جھٹکے نال جہاز شہر ٹھٹھہ دے کول سندھ دریا دے کنڈھے تے زمین نال ٹکرایا تے پُرزے پُرزے ہو گیا۔ اوہ اپنی جان قربان کر کے نہ صرف پاکستان داسر فخر نال اُچا کر گئے بلکہ دشمن دی چال نوں وی کامیاب نہ ہون دتا۔

5- میجر اکرم شہید رحمۃ اللہ علیہ

میجر اکرم 13 دسمبر 1971ء نوں معرکہ ”ہلی“ وچ شہید ہوئے۔ ایہہ اک سرحدی چوکی سی جیہدے تے دشمن قبضہ کر کے



ساڈی سپلائی لائن توڑنا چاہتا تھا اس پر میجر اکرم نے اوہدا کوئی حملہ کامیاب نہ ہوون دیتا۔ 13 دسمبر نوں دشمن نے بھاری اسلحے نال زبردست حملہ کردیتا۔ میجر اکرم شہید نے ایتھے اک جنگی چال چلی۔ دشمن نوں مغالطے وچ رکھ کے اوہدے تے حملہ کر کے پوری بٹالین دا صفایا کردیتا، نالے بوہت سارے ٹینک تباہ کردتے۔ ایس دوران دشمن نال ہتھ پائی ہوئی جیہدے وچ آپ نوں شہادت دا رتبہ نصیب ہو یا تے ”نشان حیدر“ دے حقدار قرار پائے۔

6- میجر شبیر شریف شہید رحمۃ اللہ علیہ



میجر شبیر شریف نے سلیمانکی فاضلکا محاذ تے کمپنی کمانڈر دے طور تے دشمن دا مقابلہ کیتا۔ دشمن دے دفاعی انتظامات وچ اک نہر دے علاوہ کنکریٹ تے لوہے دے مورچے تے بارودی سرنگاں سن، نہر تے اک بوہت وڈا بند وی سی۔ میجر شبیر رحمۃ اللہ علیہ دشمن دا بڑی بہادری نال مقابلہ کردے ہوئے تن (3) کلومیٹر آگے ودھدے گئے تے دشمن دی اک چوکی تے پنڈتے قبضہ کر لیا۔ اوہناں بڑی دلیری نال نہروں پار کیتا تے دشمنان نوں مورچیاں وچوں وی نسا دیتا۔ ایس دوران اک گولہ اوہناں دے سینے وچ آگیا۔ پراوہ شہادت توں پہلاں اپنا مشن پورا کر چکے سن۔ اوہناں نوں ایس بہادری تے ”نشان حیدر“ ملیا۔

7- سوار محمد حسین شہید رحمۃ اللہ علیہ

پہلے فوجی سپاہی جیہناں نے ”نشان حیدر“ دا اعزاز حاصل کیتا۔ اوہ بکتر بندر جمنٹ وچ ہلکی موٹر گاڑیاں دے ڈرائیور



سن 5 دسمبر 1971ء نوں اوہناں نے رضا کارانہ طور تے جنگ وچ حصہ لین دی پیش کش کیتی جیہڑی قبول کر لئی گئی۔ اوہناں دے حوالے اک سٹین گن کردتی گئی۔ ایس رجمنٹ نوں حکم ہو یا پئی ”نالہ ڈیک“ تے ”بیس“ ول دشمن دی فوج نوں آگے ودھن توں ڈک دیتا جاوے۔ ایس معرکے وچ سوار محمد حسین رحمۃ اللہ علیہ کلے دشمن دے مورچیاں ول اپڑ گئے۔ اچانک حملہ کر کے دشمن نوں بھاری نقصان پہنچایا۔ ایس دوران دشمن دی مشین گن دیاں کئی گولیاں اوہناں دے سینے وچ وجیاں پراوہ شہید ہون توں پہلاں دشمن دے حملے نوں ناکام بنا گئے۔

8- لانس نائیک محمد محفوظ شہید رحمۃ اللہ علیہ

سپاہی دی حیثیت نال ایہہ دو جے مجاہدسن ”نشان حیدر“ دا اعزاز پایا تے لاہور دے باڈر واگہ اٹاری تے شہید



ہوئے۔ ساڈے فوجیاں نے دشمن دی اک چوکی جیہڑی نہر دے پل تے سی قبضہ کر لیا۔ دشمن ایس چوکی نوں واپس لین لئی دور جمنٹ فوج لے آیا۔ لانس نائیک محمد محفوظ رحمۃ اللہ علیہ اپنی مشین گن نال دشمن تے گولیاں ورساندے رہے پر دشمن دے اک گولے نال ایہہ مشین گن بیکار ہو گئی۔ اوہناں نے اک ہور مورچے وچ چھال ماری جیہدا تو پچی شہید ہو چکیا سی۔ ایس مشین گن نال دشمن دے ”بنکر“ تے فائر کھول دتا۔ دشمن دے توپ دے گولے نال اوہناں دی لت زخمی ہو گئی۔ پر اوہ دشمن دے بنکر وچ کد گئے۔ اپنے چرنوں اک گولی محمد محفوظ رحمۃ اللہ علیہ دے سینے وچ وج گئی تے اوہناں نے دشمن دے اک توپچی دی دھون نوں دبوچ لیا۔ اپنے وچ دشمن دے اک سپاہی نے اوہناں تے فائر کر دتا تے دُوبے نے اپنی سنگین اوہناں دے جئے وچوں پار کر دتی۔

9- کیپٹن کرنل شیر شہید رحمۃ اللہ علیہ

کیپٹن کرنل شیر شہید رحمۃ اللہ علیہ اصل وچ کیپٹن سن اوہناں داناں کرنل شیر سی۔ اوہناں نے معرکہ کارگل وچ دشمن تے کاری چوٹاں لائیاں تے ”نشان حیدر“ دا اعزاز حاصل کیتا۔



8 جون 1999ء دی درمیانی رات نوں دشمن دی اک بٹالین نے کیپٹن شیر رحمۃ اللہ علیہ دی چوکی تے قبضہ کرن دی کوشش کیتی۔ کیپٹن شیر رحمۃ اللہ علیہ نے جرات مندی داثبوت دیندیاں ہو یاں دشمن دی ناکہ بندی ایس طراں کیتی پئی اوہنوں نکلر انقصان چکنا پیا۔ 8 جون نوں کیپٹن شیر رحمۃ اللہ علیہ نوں پتا لگیا پئی دشمن پتھر ملی چٹاناں پچھے لکھیا ہو یا اے تے تازہ کمک دی اڈیک وچ اے۔ کرنل شیر رحمۃ اللہ علیہ نے فوراً سیکشن دی نفری تے مشتمل اک لڑاکا گشت ترتیب دتی تے دشمن اُتے رات دے ویلے حملہ کر کے چالی (40) سپاہیاں نوں ڈھیر کر دتا تے دشمن دیاں صفاں وچ تھرتھلی پادتی۔ اپنی لڑاکا گشت نوں پوری حفاظت دے نال اپنی چوکی تے لے آئے۔

5 جولائی نوں دشمن دی دو بٹالین نفری نے کیپٹن شیر دی چوکی تے کئی پاسیوں حملہ کر دتا۔ جیہدے نال چوکی دا کجھ حصہ دشمن دے قبضے وچ آ گیا۔ کیپٹن شیر رحمۃ اللہ علیہ نے گھٹ سپاہیاں نال حملہ کر کے اپنا علاقہ دشمن کولوں چھڑا لیا۔ پرایس حملے دوران اوہ زخمی ہو گئے تے ایہناں زخماں پاروں اپنی جتی ہوئی چوکی تے شہید ہو گئے۔

10- حوالدار لاک جان شہید رحمۃ اللہ علیہ

حوالدار لاک جان رحمۃ اللہ علیہ دی حیثیت ناردرن لائنز انفنٹری دے اک پبیک، نڈرتے بہادر سپاہی دی اے۔ مئی



1999ء وچ دشمن دے زمینی حملیاں دی تیاری دا پتہ لگاتے لالک جان نے دشمن نال لڑن لئی اپنی خدمات پیش کیتیاں۔ جون دے آخری ہفتے دشمن نے لالک جان دی چوکی تے حملہ کر دتا۔ اوہناں نے اپنی جان دی پرواہ کیتے بغیر دشمن تے فائر کھول دتا تے مورچیاں وچ جا جا کے فوجی جواناں دے حوصلے ودھاندے رہے۔ ساری رات لڑائی ہوندی رہی۔ اوہناں دا حملہ ایسا سخت سی پئی دشمن لاشاں چھڈ کے بچن تے مجبور ہو گیا۔ اگلی رات دشمن نے فیر حملہ کیتا تے اوہنوں مونہہ دی کھانی پئی۔

7 جولائی نوں دشمن نے لالک جان دی چوکی تے تنوں (3) پاسیاں توں حملہ کر دتا تے دشمن دے فائر نال لالک جان زخمی ہو گئے پر ایہدے باوجود مقابلے تے ڈٹے رہے تے آخری دم تک دشمن دے حملیاں نوں ناکام بناؤندے رہے۔ اخیر اپنی چوکی دا دفاع کر دے ہوئے شہید ہو گئے۔ حوالدار لالک جان دی دلیری، حوصلہ مندی تے جذبہ شہادت نوں مکھ رکھدیاں ہو یاں حکومت نے اوہناں نوں ”نشان حیدر“ دتا۔

اوکھے لفظاں دے معنے

لفظ	معنے	لفظ	معنے	لفظ	معنے
جُتھے وچوں	بدن وچوں	آن	عزت	دلیری	بہادری
تگڑا	طاقت ور	بوہت	زیادہ	مکھ	ساہمنے رکھدیاں ہو یاں

مشق

- 1- میجر محمد طفیل شہید رحمۃ اللہ علیہ نے کیہڑی بہادری کیتی جس دے بدلے اوہناں نوں ”نشان حیدر“ دتا گیا؟
- 2- کیپٹن سرور شہید رحمۃ اللہ علیہ نے بھارتی فوجاں کولوں پہاڑی کس طراں حاصل کیتی؟
- 3- میجر عزیز بھٹی شہید رحمۃ اللہ علیہ نے لاہور نوں دشمن کولوں محفوظ رکھن واسطے کیہڑا کارنامہ کیتا سی؟
- 4- راشد منہاس شہید رحمۃ اللہ علیہ دا جہاز کون اغوا کر رہیا سی تے راشد نے ایس منصوبے نوں ناکام بناؤن لئی کیہ کیتا؟
- 5- ایہناں شہیداں دے کارنامیاں توں سانون کیہ سبق ملدا اے؟ آسان لفظاں وچ بیان کرو۔

قدم ودھائی چلیے

آؤ قدم ودھائی چلیے اوکھا پنڈھ مکائی چلیے
 سدھے رستے ٹردے جایی
 بھلیاں تائیں رستے پایی
 پتھر دور ہٹائی چلیے

آؤ قدم ودھائی چلیے
 نال اڈم دے محنت کریے
 جھولی دے وچ خوشیاں بھریے
 دیس دی راہ چکائی چلیے

آؤ قدم ودھائی چلیے
 قوم دے دکھ ونڈاندے جایی
 گیت خوشی دے گاندے جایی
 شاکر سکھ ورتائی چلیے

آؤ قدم ودھائی چلیے

(رمضان شاکر)

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے	لفظ	معنے
اوکھا	مشکل	پنڈھ	پنڈا	رستے پانا	سدھاراہ دسنا	سکھ	آرام	ورتانا	ونڈنا

مشق

- 1- شاعر نے ایس نظم وچ کیہڑا کم کرن لئی آکھیا اے؟
- 2- پہلے بند وچ شاعر نے پتھر وور ہٹان لئی آکھیا اے، ابہدا کیہ مطلب اے؟
- 3- سکھ ورتان توں کیہ مراد اے؟

دو ککڑ

پھتو اک پنڈ وچ رہنداسی۔ ایس پنڈ داناں سندر پوری۔ پنڈ دے ناں وانگر ایس پنڈ دے لوک وی سندر تے سوہنے سن تے اک دو جے دی عزت کر دے سن۔

پھتو ولد کتھو ولد تھو نہ واہی گوڈی کرداسی تے نہ ای لوہارا، ترکھانا۔ نہ اوہ کھڈی تے کپڑا بنداسی تے نہ ای سندر پور دے ڈھ اُتے مچھیاں پھرن جانداسی۔ اوہ سندر پور دا قصہ گو سی۔ سویر توں شام تیکر پنڈ دیاں بالاں، زنانیاں نوں کہانیاں سنا سکے خوش رکھداسی۔ لوک اوہ دیاں کہانیاں توں خوش ہو کے اوس نوں دانہ پھکاتے پیسا دھیلا دے دیندے سن جس نال اوس داتے اوہدی گھر والی دا گزارہ ہونداسی۔ اوس توں پہلاں اوس دا پوکھو تے کتھو توں پہلاں اوس دا دادا تھو پنڈ دے قصہ گو رہ چکے سن۔

اک دن سندر پور اک سوداگر آیا تے اوس نوں پھتو نے کہانی سنائی۔ کہانی سوداگر نوں بوہت پسند آئی تے اوس نے پھتو نوں آکھیا پئی اوہ شہر جا کے بادشاہ نوں کہانی سنائے، کیوں جے بادشاہ کہانی سنن دا شوقین اے تے ہر پیر نوں اپنے دربار وچ کہانیاں سندا اے، پر کہانی سنن دی اک شرط اے، تے اوہ شرط ایہہ وے ”جے کہانی جھوٹی ہووے گی تے اوہ پنج (5) ہزار اشرفیاں انعام دے گاتے جے کہانی سچی ہووے گی تے کہانی سناؤن والے دا سر قلم کر دیتا جاوے گا۔“

ایہہ گل سن کے پھتو خوش وی ہو یا تے ڈر یا وی۔ خوش ایس واسطے ہو یا کہ شاید پنج ہزار اشرفیاں مل جان، ڈر یا ایس کر کے پئی ہو سکد اے بادشاہ کہہ دیوے کہانی سچی اے تے اوہ دا سر دھرتوں دکھ کر دیتا جاوے۔

پھتو نوں اپنے آپ تے بھروسا سی۔ ایس واسطے اوہ دو جے دن روٹی۔ پلے پنھ کے اپنی ٹبری دیاں دعاواں نال سفر تے ٹریا۔ اوس زمانے وچ نہ بساں سن، نہ گڈیاں تے نہ ای ہوائی جہاز۔ بہر حال اوہ کئی دن بعد اوکھتاں سہندا، منزل منزلی، بادشاہ کول اپڑ گیا۔ ایہہ پیر دا دن سی۔ کئی قصہ گو آئے ہوئے سن۔ اوس نے وی اپنا ناں دے دیتا۔

بادشاہ کہانیاں سندا رہیا تے آکھدا رہیا۔ ”ایہہ سچی کہانی اے۔ ایہہ سچی کہانی اے“ جلا د آؤندا، تے بادشاہ دے مونہوں ایہہ گل سن کے کہانی سناؤن والے نوں پھڑکے لے جاند۔ اخیر تے پھتو دی واری آئی تے اوس نے بادشاہ، بادشاہ دے والد تے بادشاہ دے دادے دی تعریف کرن دے بعد کہانی سناؤنی شروع کر دتی۔ اوہ کہانی انج سی۔

”اک زمانہ سی جد میرے دادے کول دو ککڑ سن۔ میرا دادا تھو ایہناں اُتے لون دیاں دو دو چھٹاں لد کے پنڈ و پنڈ جانداسی تے لون دے بدلے کنک، جوار تے گڑ لیا نڈاسی، انج اوہ اپنا، اپنی ٹبری داتے اپنے پتر کتھو دا پیٹ پالدا سی۔ ساؤن دی رت آئی تے اک دن اک ککڑ تلک پیاتے اوس دا پنج زخمی ہو گیا۔ میرے دادے نے زخمی ککڑ توں اک چھٹ اتار کے صحت مند ککڑ اُتے رکھ دتی۔ ہن ہو یا ایہہ پئی اک ککڑ اُتے بھار زیادہ ہو گیا، کیوں جے اوہ دے تے دو (2) دی تھاں تن (3) چھٹاں سن۔ ایہہ نتیجہ ایہہ نکلیا پئی ککڑ دی کنگروڑ اُتے لاگا لگ گیا۔ زخمی ککڑ دے علاج لئی میرے دادے نے گلی وچوں مٹی دا بک بھر کے زخم اُتے سٹیا تاں

جے کھرینڈ آجاوے۔ ایس مٹی وچ بوہڑ دا بی سی۔ راتوں رات ککڑ دے لک اُتے بوہڑ دا بوٹا اُگ آیا تے ویکھدیاں ویکھدیاں درخت بن گیا۔

ہن ککڑ جس پاسے جاندا، بوہڑ دا درخت وی اوہدے نال جاندا۔ گرمیاں دا موسم آؤندا تے لوک مچیاں، پیڑھیاں تے موڑھے لے کے اوہدی چھاں تھلے ڈاہ لہندے تے آرام کر دے۔ فیر بوہڑ نوں مٹھیاں گولھاں پے گنیاں۔ بالان نے گولھاں کھان لئی ڈھیماں مارنیاں شروع کر دیتاں۔ کچھ ڈھیماں گولھاں نال زمین تے آجاندیاں تے کچھ اُتے اٹک جاندیاں۔ ہوندیاں ہوندیاں بوہڑ اُتے کھیتیر بن گیتے میرے دادے نھونے میرے پیو کتھو دی مدد نال اوہدے وچ کنک بیج دتی۔

اک دن ہنساں دا جوڑا بوہڑ توں اڈ کے لنگھیا تے اوہناں دیاں چنچاں وچوں موتی ڈگ پئے تے اوہ وی کھیتیر وچ بیجے گئے۔ جدوسا کھدے مہینے وچ کنک پکی تے نال ای موتیاں دی فصل تیار ہو گئی۔ سو من کنک نکلی تے سو من موتی۔

وسا کھدے مہینے وچ ای نال دے ملک نے ساڈے ملک تے حملہ کر دتا۔ چھ مہینے تیک ساڈے سپاہی بڑی بہادری نال لڑدے رہے۔ پرفیر خزانہ خالی ہو گیا۔ بادشاہ سلامت دے دادا جان بوہت گھبرائے۔ پر میرے دادا جان نے اوہناں نوں تسلی دتی تے سو من موتی اوہناں نوں ادھار دے دتے۔ بادشاہ نے ایہہ موتی اپنے سپاہیاں وچ اوہناں دی بہادری ویکھ کے وند دتے۔ سپاہی ہور حوصلے تے بہادری نال لڑے تے دشمن ملک نوں ہرا دتا۔

فتح دے بعد میرے دادے نے موتی منگے تے حضور دے دادا جان نے انکار کر دتا۔ میرا دادا ہو کے نال مر گیا تے پیو غریبی ہتھوں۔ کچھ ہُن میں رہ گیا واں، سو من موتیاں دا حقدار میں واں۔ دے دیو گے تاں مہربانی نہ دیو گے تاں وی مہربانی۔“

پھتو دی کہانی سن کے بادشاہ نے جھٹ کہیا ”ایہہ جھوٹی کہانی اے۔“

انج پھتو بیج ہزارا شرفیاں جت گیا۔

اوکھ لفظاں دے معنے

لفظ	معنے	لفظ	معنے	لفظ	معنے	لفظ	معنے
ڈمھ	ڈونگھاپانی	قصہ گو	کہانی سناؤن والا	چھٹاں	دوہریاں پوریاں	ٹبری	گھروالی
کنگروڑ	لک دی ہڈی	لاگا لگ گیا	زخم آیا	اوکھت	مشکل		

مشق

- 1- پھتو دا پنڈ وچ کیہ کاروبار سی؟
- 2- ککڑ زخمی کویں ہو یا؟
- 3- جے بادشاہ کہہندا سچی کہانی اے تے فیر کیہ ہوندا؟

دو کنجوس

اپنے بُوہے آن کے راتیں آکھن لگا دارا
 میں ادھ داٹوں پرت کے آیاں داریئے ڈردا مارا
 پھوکاں مار بجھائیں چھیتی اس دا لاٹ منارا
 دیوا بددا چھڈ گیا میں بندہ بھلن ہارا
 کرماں والینے ویکھیں کدھرے تیل نہ سڑجائے سارا
 داری آکھیا توں کیوں پایا گھاٹا ایڈا بھارا
 سئے پھیرے بوٹ گھسائے ایہہ کیوں کیتوئی کارا
 دارے آکھیا ”توں کیہ جاتا اینا بھولا اے دارا؟“
 مینوں کتھے وارا کھاندا اے ایڈا سخت خسارا
 کچھے مار کے جُتی کیتا اے ننگے پیر گزارا
 شوماں دی اس جوڑی دا سی بھار زمین تے بھارا
 ڈاڈھا چنگا کم اک کر گئے، مر گئے داری دارا
 (انور مسعود)

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
ادھ داٹوں	ادھ راہ وچوں	لاٹ منارا	روشنی دا بینار	شوم	کنجوس	کچھے مارنا	بغل وچ دباننا

مشق

-1 ایس نظم نوں اپنیاں لفظاں وچ بیان کرو؟

-2 ایس نظم توں کیہ سبق ملدا اے؟

عید الفطر

رمضان شریف دے مہینے وچ ہر مسلمان واسطے روزے رکھنا فرض اے۔ روزے رکھن والے نوں اللہ تعالیٰ دی عبادت دے نال نال اپنے جسم نوں تندرست بناؤن داوی موقع ملدا اے۔ روزیاں دے ختم ہون اُتے رب تعالیٰ دا شکر ادا کرن واسطے ساری دنیا دے مسلمان عید الفطر دا تہوار مناؤندے نیں۔ اللہ دا شکر ایس واسطے کہ اوہنے سانوں روزے رکھن دے فرض نوں ادا کرن دی توفیق دتی۔ عید الفطر مسلماناں واسطے اک وڈا اسلامی جشن تے میلا اے، جیہدے آؤن دی سال بھراڈیک رہندی اے۔ اسلام وچ خوشی دا ویلا ہووے تے بھانویں غمی دا، مسلمان اپنے رب دے حضور جھک کے بندگی دا اظہار کردے نیں۔ ایہہ وجہ اے کہ عید دی خوشی مناؤن ویلے سبھ توں پہلاں، ہر شہر دے مسلمان کسے عید گاہ وچ یا کسے کھلے میدان وچ اکٹھے ہو کے اللہ دا شکر ادا کرن واسطے عید دی نماز پڑھدے نیں۔ اپنے عزیزاں واسطے تے ساری دنیا دے مسلماناں واسطے دعاواں منگدے نیں۔ رب دی عبادت توں ویلے ہو کے سبھ مسلمان اپنے سبھاں، یاراں، بھراواں تے محلے داراں نال گلے مل کے اک دوجے نوں مبارک باد دیندے تے اک دوجے دی خوشی وچ شامل ہوندے نیں۔ انج ساری دنیا دے مسلمان اک دوجے دے دکھ سکھ دے ساتھی بن دا اقرار کردے نیں۔

اوہ لوک جیہناں نوں رب نے دولت تے روپے پیسے نال نوازا ہووے، اوہ خیر خیرات کردے نیں۔ اپنے توں چھوٹیاں تے کمزوراں نوں اپنے پیراں اُتے کھلون لئی مدد دیندے نیں۔ یعنی فطرانہ ادا کردے نیں۔ فطرانہ دین ویلے ایہہ اصول ساہمنے رکھیا جاندا اے کہ ایہہ فطرانہ لوڑ وند لوکاں نوں عید دی نماز پڑھن توں پہلاں ادا کیتا جاوے تاں جے ماڑے، مسکین، یتیم تے کمزور لوک عید دی خوشی وچ برابر دے شریک ہو سکن۔



عید الفطر دا ایہہ مذہبی تہوار بھائی چارے، اخلاق، تے اک دوجے دی مدد کرنی سکھاندا اے۔ مسلماناں وچ پیار، محبت تے اخوت ودھاندا اے۔ ایس تہوار والے دن ہر پاسے بڑی رونق تے چہل پہل ہوندی اے۔ ہر کوئی اپنی توفیق دے مطابق نویں نویں کپڑے پاؤندا اے۔ بچے خاص طور تے ایس خوشی دے تہوار پاروں ساری رات جاگدے تے سویردا انتظار کردے رہندے نیں۔ نویں نویں کپڑے پا کے اپنے بزرگاں نال عید گاہ ول جاندے نیں۔ عید گاہ دے چار چوہیرے اک میلے ورگاساں ہوندا اے۔ کئی طراں دیاں دکاناں سجائیاں جاندیاں نیں۔ بچیاں دی تفریح تے کھیڈ تماشے وی ہوندے نیں۔ عید دی تیاری وچ رمضان شریف دا پورا مہینہ بازاراں وچ چیزاں خریدن والیاں دی بھیڑ رہندی اے، پر عید دے دن وی ایہہ خرید و فروخت جاری رہندی اے۔ گھراں وچ مٹھیاں چیزاں خاص کر کے سیویاں پکائیاں جاندیاں نیں۔ بازاراں وچ مٹھائی دیاں دکاناں اُتے بھیڑ لگ جاندی اے۔ لوک خوشی خوشی اک دوجے نوں مبارکاں دیندے تے اک دوجے دا مونہہ مٹھا کران وچ سارا دن گزار دیندے نیں۔ ہر کوئی خوش خوش نظر آؤندا اے۔ ہر اک پاسے خوشی بھنگڑے پاؤندی اے۔ بچے، بڈھے، جوان سبھ دے چہریاں اُتے اک خاص چمک لٹکاں ماردی اے۔ عید دے دوسرے دن ایہہ رونق میلا جاری رہندا اے۔ انج عید الفطر دا تہوار پوری مسلمان قوم نوں خوشی، اتفاق، اخلاق تے اخوت دی دولت نال مالا مال کر دیندا اے۔

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
رمضان	اک اسلامی مہینہ جیہدے وچ مسلمان روزے رکھدے نیں	اسلامی جشن	اسلامی میلا	و پہلے ہوکے	فارغ ہوکے	نوازیاء	دیتا اے
اتفاق	سانجھ	سماں	نظارہ، منظر	بھنگڑا	خوشی داناچ	اخوت	بھائی چارا

مشق

- 1- عید الفطر دا تہوار کیوں منایا جاند اے؟
- 2- روزے کیوں فرض قرار دتے گئے نیں؟
- 3- عید دے دن لوک اپنی خوشی دا اظہار کنج کردے نیں؟
- 4- فطرانہ، عید دی نماز پڑھن توں پہلاں ادا کرنا کیوں ضروری اے؟

بات بتولی

پاواں بات بتولی پاواں، بات دی رکھیو لاج
اک انسان، قلندر، جیہدا دل تے ہُن وی راج
اوہدیاں خواہاں، دیس نویں داسرتے رکھیا تاج
جیہڑا بُجھے بات بتولی، اوہدا ذہن کمال

— علامہ اقبال رحمۃ اللہ علیہ

پاواں بات بتولی پاواں، بات دا رکھیو مان
جیہنوں کدی مٹا نہیں سکدا، کوئی تیز طوفان
پاکستان بناون والا، اک سچا انسان
جیہڑا بُجھے بات بتولی، اوہدا ذہن نیارا

— قائد اعظم رحمۃ اللہ علیہ

پاواں بات بتولی پاواں، بات اے بوہت آسان
دیساں وچوں دیس نرالا، جس دی اُچی شان
اوتھے رہن، پنجابی، سندھی نال بلوچ، پٹھان
جیہڑا بُجھے بات بتولی، اوہدی جیوے جان

— پیار پاکستان

(ڈاکٹر رشید انور)

اوکھے لفظاں دے معنے

لفظ	معنے	لفظ	معنے	لفظ	معنے	لفظ	معنے
بات بتولی	بُجھارت	لاج	عزّت	ذہن	دماغ	مان رکھنا	عزّت رکھنا

مشق

1- نظم زبانی یاد کرو۔

2- دوسرے طالب علماں اگے ایہہ بُجھارتاں پا کے جواب پُچھو۔

میں چنگا انسان بناں گا

میں چنگا انسان بناں گا
 اپنے وطن دا مان بناں گا
 مچھلاں کولوں لے کے ہاسے
 ونڈاں گا میں سارے پاسے
 نکیاں وڈیاں لئی ہرویلے خوشیاں دا سامان بناں گا
 میں چنگا انسان بناں گا
 راہیاں نوں دساں گا راہواں
 بھائیاں دے لئی بناں گا بانہواں
 انھیاں مورییاں تے مجبوراں دے میں نین پران بناں گا
 دیس توں جنڈڑی واراں گا میں
 پیار دے رنگ کھلاراں گا میں
 ایٹھوں لے کے اوتھوں تیکر دھرتی دی میں شان بناں گا
 (بشیر مُنڈر)

اوکھے لفظاں دے معنے

لفظ	معنے	لفظ	معنے	لفظ	معنے
انھیاں مورییاں	جیہناں دیاں اکھاں نہ ہوں	بناں گا بانہواں	مددگار بناں گا	نین پران	اکھاں تے ہتھ پیر

مشق

1- نظم زبانی یاد کرو۔

2- ایس نظم راہیں شاعر نے کیہ سبق دیتا ہے؟